





玉堂類稿卷第四

周益文忠公集一百四



詔書

記

劄子

序

加上太上皇帝太上皇后尊號詔

乾道六年十一月一日

門下饗帝者聖人為能既深慙于涼德事親者天子之
 孝當益播于鴻名參古今甚盛之規侈家國非常之慶
 光堯壽聖太上皇帝與天同大體道之宗壽聖太上皇
 后如月之明以慈為寶久非心于黃屋方自德于大庭
 言念眇冲親膺傳授屢周于歲籥寅恭三款于陽
 陔祖宗遺我以閔休高厚畀予以景况匪仰遵于慈訓
 疇克對于昌期宜極推崇豈容滿假矧未央為壽遠符

漢祖之九年而興慶歸尊具著唐宗之再請用消穀旦
 交舉曠儀俯同中外之歡心並衍尊親之榮號懇章繼
 上俞旨甫頒雖蕩：民無能名豈易測知于聖德然業
 業日致其孝庶^幾單竭于忱誠以承有美之休以對無疆
 之壽光堯壽聖太上皇帝宜加上尊號曰光堯壽聖憲
 天體道太上皇帝壽聖太上皇后宜加上尊號曰壽聖
 明慈太上皇后其令有司詳具儀注朕當親率百官詣
 德壽宮奉上冊寶告于普率共此榮懷故茲詔示想宜
 知悉

舉賢良方正詔

乾道七年十月十一日

勅門下蓋聞制科取人盛于兩漢然或以陰陽靡調或
 以方內靡安乃勅郡國舉而行之本朝則不然無事而
 勤求有為而獲用上下交應為後世法肆朕紹服于今
 十年詔書數下勤：懇：間復略傳註寬舉薦幾以招
 徠修潔博習之士輔朕不逮屬者有司嘗以一二應書
 既命待詔公車矣歲當大比其博求之夫寤寐忠賢寧
 厭乎多士抱負器業或患乎無時朕之誠意子大夫其
 著聞矣來游來歌以天其音不在此乎今歲科場其令
 尚書侍郎兩省諫議大夫以上御史中丞學士待制各
 舉賢良方正能直言極諫一人守臣監司亦許解送仍

其詞業繼進以聞故茲詔示想宜知悉

改左右丞相詔 乾道八年二月五日

勅門下朕惟帝王之世輔弼之名雖殊而相之實一也
在成湯時則有若伊陟在成王時則有如周召或左或
右皆見于經厥後位號定于漢而稱謂汨于唐以僕臣
而長百僚朕所不取且丞相者道揆之任也三省者守
法所自出也今舍其大而舉其細豈責實之誼乎肆朕
稽古釐而正之蓋名正則言順言順則事成為政之先
務也其改尚書左右僕射同中書門下平章事為左右
丞相庶幾採前代之舊成本朝之制焉

加上太上皇帝太上皇后尊號詔 淳熙二年十

月五日

勅門下錫九疇之福而曰壽曰康亶敷言於帝訓有四
海之富而得名得位壽不佑命于天申胥同率土之心仰
篤嚴君之慶光堯壽聖憲天體道太上皇帝剛健純粹
徽柔懿恭以德行仁本性誠之固有修文偃武合經緯
之自然翼位當七十載之期敬休獲萬億年之報壽聖
明慈太上皇后聖善明哲慈和靜專月齊日以得天而
能久照坤順乾而配地是以廣生念非昭揭于鴻名何
以對揚於鉅典且堯壽獨高於五帝時則有放勳之稱

而魯邦僅列於諸侯尚能歌燕喜之頌矧予天下之養
逢此古來之稀是宜稽紹興乾道之已行於以補兩漢
有唐之未脩博採群公之議度伸再駕之恭將祇迓於
春祺庸對敷於寶冊一言以蔽固難形盛德之日新萬
壽無疆蓋欲輯曠儀而歲講式揚名明命前詔多方庶令
好善之民體我事親之孝光堯壽聖憲天體道太上皇
帝宜加上尊號曰光堯壽聖憲天體道性仁誠德經武
緯文太上皇帝壽聖明慈太上皇后宜加上尊號曰壽
聖齊明廣慈太上皇后其令有司詳具儀注朕當親帥
群臣詣德壽宮奉上册寶故茲詔示想宜知悉

科舉詔

淳熙四年二月一日

勅門下朕惟四術以造士三年而興賢崇化勵俗未有
或先于此者粵予涼菲寤寐髦雋郡國詔書凡五下矣
期無愧于前聞有補于當世豈為虛文也哉興言大比
今復其時乃飭攸司申諭朕志其各以賢能之書來上
朕將親策于廷使在我選中者皆足以章明治教振宣
事功豈惟予一人以寧時爾多士亦有無窮之聞故茲
詔示想宜知悉

幸學詔

淳熙四年二月五日

勅昔我藝祖肇造帝室禮樂征伐猶未遑暇乃開基之

月首幸國學越二月又幸既宏先聖先師之宇復審象
而為之贊本原治道厥有深旨然則掃五季之陋削諸
侯之僭垂萬世之統不在斯文乎列聖相承遂為家法
太上中興開設學校乘輿臨幸儒術益光肆朕纂圖儲
精稽古憲章祖述夙夜不敢忘爰以仲春謁款將聖躬
釋菜之禮闡中庸之義臣工侍列多士濟々洙泗遺風
儼然在目朕甚嘉之明揚訓辭尚迪朕志夫孝于事親
忠于事君學之本也業精于勤行成于思學之序也聖
賢復起不易斯言子大夫其念哉當為君子之儒毋慕
人爵之得使予尊德樂道之心著化民成俗之效行光

于祖宗對于慈訓斯無負于樂育在汝等勉之而已故
茲詔示想宜知悉

繳奏

臣昨日于龔茂良李彥穎處恭聆聖訓令臣撰幸學
詔書內用當為君子之儒毋專人爵之得兩句臣尋
具草進入緣一時耳受不審以專為慕今準御筆始
知其訛欲候批降草本至院即改正修寫伏乞睿照
御筆慕字尤工更不須改

舉賢良方正詔 淳熙四年三月十日

勅門下朕惟乾德興邦咸平熙載天聖御圖之始紹興

復古之初皆設制科博詢讜論粵予涼德欣慕前規茲當貢舉之秋仍下方聞之詔翹其楚翼賢雋之無遺諤而昌抑邦家之有賴咨爾闈臺之彥暨夫嶽牧之官或薦進于中朝或搜揚于外服俾摠所蘊陳古今致治之原將策于廷振臣庶敢言之氣毋借才于異代庶復德于我家布告多方明知朕意今歲科場其令尚書侍郎兩省諫議大夫以上御史中丞學士待制各舉賢良方正能直言極諫一人守臣監司亦許解送仍具詞業繳進以聞故茲詔示想宜知悉

戒飭諸路轉運司手詔

淳熙六年三月二十四日

朕躬節儉以先天下無暴征無苛取期我元躋于富庶之域郡國之間宜若公私交裕矣今顧不然豐年樂歲中外少事或未免于匱乏州迫其縣迫吾民其故安在無乃賦入寡而用度衆歟吏二千石有能不能歟將輕費妄用莫知撙節歟朕深居九重無以徧察故分道置臺寄耳目于爾漕臣職當計度欲其計一道盈虛而經度之也職在按察欲其蚤正素治毋使至于病民也厥或異此朕何賴焉且汝不聞黍苗之詩乎我任我輦我車我牛謂美召伯能成轉輸之功也後世以是名官寧無意耶曰陰雨膏之言能養民如膏雨也其卒章

曰王心則寧言家給人足乃能安王之心也汝等得不
深思古誼視所部為一家周知其經費而通融其有無
廉察其能否而裁抑其耗蠹數者備矣郡計何患乎不
足郡計足則屬邑寬屬邑寬則民力裕民力裕則吾宵
旰之慮釋國有信賞于汝何吝若乃有餘者取之不足
者聽之逮其乏事然後從而劾之斯亦晚矣是則黜罰
之行奚獨郡守而已諸道轉運其明知朕意

繳進詔草劄子

臣昨因宣引嘗妄奏朝廷責財計于諸路諸路責財
計于州縣上下通融當如一家此不易之理也今領不

然朝廷督諸路轉運使不過常賦爾未嘗有所橫取也
而為漕臣者間有不能仰體德意竭州郡之力而弗恤
此何理也夫謂之計度轉運是欲其斡旋一路財計使
之有無相通也居是官者奈之何略不究此臣不暇遠
舉只論去年數月之間紛紜者三單舉夔以待從典輔藩
緣不支歸正人添給通衢之中扯裂車帷永州守臣徐
樞初授代日歸正及添差揀汰人相率攔轎醜詆知南
劍州林栗在任丁憂亦為添差人等妻女詬厲夫二千
石尊重難危緩急乃可彈壓若使其下常懷忿嫉伺間
而侵侮之國家間暇不過少失事體而止萬一疆場或

或駭征伐于外其弊則將若何比來朝廷雖量貶守臣懲治無賴然臣謂齊其末不若治其本何也俸料不支無以養生此小人所以不遜也財用匱乏支遣不繼此守臣所以束手也臣常深思州用匱乏之由蓋有三說一則地隘民貧入寡出多不可措置二則郡守闇懦滲漏者衆不能措置三則輕費妄用不暇措置為漕臣者貧當濟之闇懦者當策勵之妄費者當戒約之甚則劾而免之夫然故有曲突之功而無噬臍之患今平居一切聽郡守之所為聞其小有盈餘又為豪奪巧取之計一遇生事亟劾守臣以自解所謂計其有無度其盈虛

者當如是乎臣願陛下戒飭諸路轉運使俾之各思其職宣朝廷之惠澤視州縣為一家上下通融早正素治勿為苟且趣了目前蓋上下通融則州郡稍寬州郡稍寬則諸縣不敢橫斂縣不橫斂則民力稍裕當今急務孰有大于此者伏蒙陛下聖明洞照深以為然今擬撰詔書令某具稿進呈未知辭意穩當否伏取進止

記

淳熙五年

選德殿記

皇帝踐祚以來宮室苑囿元未嘗增脩獨闢便殿于禁垣

之東名之曰選德規模樸壯為陛一級中設漆屏書郡
國守相名氏郡臣有圖方略來上可採者輒棲之壁以
備觀覽數延文武講論治道詢求民隱至于中外奏報
若軍國之幾務皆于此省決暇則細繹經傳或親御弧
矢雖大寒暑不廢臣某俟罪禁林間嘗奉詔獲至為一
日命臣汝為之記臣愚學不足以推廣聖意詞不足以
鋪陳盛美謹采詩禮古文以射觀德事及後世得失所
由次第其說禮君世子生三日射人以弧矢六射天地
四方其早正素定若此至擇士以祭必于射也進退天
下之才與祭者由是得為諸侯卿大夫若屬有賓客之

事燕勞之寵莫不用射詩人又于其獻酬歌嘏之餘中
度不中度罰爵與否有所休戚美刺以為是王公大人
風化黎庶者之本也由是觀之古者君臣周旋禮樂以
服習勤苦可不謂先事知懼安而能危者哉是故三代
而上卿士皆可獨將而兵民為一戎不生心世用底定
比其季也徒以為威儀觀美而實不副馳騁弋獵而政
不舉則國人為之隱憂而變風作其後王道浸缺而文
武兵農遂分而不合自秦漢而下其興衰治亂鮮不以
兵一夫閔弓注矢則塗之人往：麇驚兔逸之不暇蜂
燧終舉而見大夫至無可使未免拔將于行伍之中何

者其具素也天錫陛下勵精百世之後追踪太古之初謂射本男子之事非專于用武也射所以觀德非專于觀威也故為是殿以延群臣以裁幾務以閱圖史而命名則主乎射為起居日用之間既已默示躬行之旨宜乎小大之臣與夫四方萬里之遠循其理思其義觀感而化從上攸好勝負之爭而揖遜之寓勇力之尚而仁義之貴閑邪安于真積習慣同乎自然可以興賢能可以詢衆庶合兵民于已判同文武之異轍將于是乎在昔者宣王中興其詩曰射夫既同助我舉柴序之者曰是小雅廢而復古之詩也蓋治有先後功在不舍沉

潛剛克時乃天道陛下神聖必于此有得焉而臣何足以知之臣謹記

此記淳熙戊戌閏六月十四日進呈于倚柱殿至九月五日上遣中使李裕文携至所居宣旨令寫進欲刻之石蓋留禁中八十日往黏寘屏間其跡尚存臣某謹記尋命修內司石工張雋刻石十一月十日立於殿上

進選德殿記奏 九月六日

臣昨日承中使李裕文傳奉聖旨令臣書所撰選德殿記進入臣文詞鄙野字畫不工勉遵明詔實深震

懼謹具劄子繳進伏望聖慈恕其冒昧臣不勝屏息
俟命之至

謝御書劄子 十一月二十五日

臣適蒙聖恩召至選德殿面賜訓諭欲以御書光寵下
臣尋準中使李裕文傳示聖旨頒賜唐白居易七德舞
七德歌一軸龍螭鳳翔眩駭凡目仰惟皇帝陛下睿文
英武同符太宗選用將相內修政事將欲定兩京致太
平故有感于居易之言形諸翰墨少見聖意抑臣何幸
乃祇拜此賜昔本朝太宗皇帝以宋玉大言賜賦蘇易
簡哲宗皇帝以白居易紫薇花詩賜蘇軾皆以寵待詞

臣垂光簡冊今臣榮遇殆且過之謹當什襲珍藏傳示
子孫侈遭逢之盛其子報塞惟誓糜捐謹具手劄奏謝
伏乞睿照

進謝御書古詩

臣伏蒙聖恩賜臣御書白居易七德舞樂府一軸
天光賁飾葦室輝華臣榮感之餘謹用蘇軾謝御
書居易紫薇花絕句故事齋沐課成古詩一篇少
見戴恩之意輕贖宸嚴伏地俟罪具官臣周某上

進

父文元祐詞臣軾勁節名章世無敵御前曾賜紫薇

詩袖裡驪珠光的皦小臣謬直白玉堂也紆皇眷擣
 雲章雲章元是七德舞字：筆法超鍾王兩朝相望
 九十祀長慶集中偏屬意咸池日照草木光天門龍
 躍魚蝦悖我皇英銳直太宗文武神聖功德隆黃鉞
 指期擒頡利捷書先獻大安宮元和學士白居易臣
 非其才私有志願隨班賀四海清續唐之歌誇萬世

跋御書

淳熙五年十一月甲申臣適直禁林申漏上三刻蒙
 宣召至選德殿有中使諭旨云內翰所作殿記上燕見多
 呼詞義甚美令刻石立殿上特命觀覽讀已趨至後
 官

幄上面南坐起居畢詣榻前再拜謝天音獎諭如初
 因泛論三代以來人君知道與否遂評六經諸子下
 至道釋精粗累數百年言臣偶及聖人之言異乎賢人
 即訓臣曰聖賢氣象廣狹極相遠如孔子謂飽食終
 日無所用心不有博奕者予為之猶賢乎已至孟子
 則云人飽食煖衣逸居而無教則近于禽獸夫人為萬物
 之靈安可輕比禽獸又論易繫辭復數百言皆老生
 宿儒沒世窮年晝思夕願讀所不能至者臣第知俯首
 傾耳服膺而已將退命坐賜卮酒侑以時果飲醕欲
 興復宣坐賜茶上曰待以惡札賜卿聖語不敢易臣以著謙德

頓首稱謝薄暮歸院而奎畫隨至蓋書白居易七德
舞一軸鸞翔鳳騰體八法鍾繇羲獻方之茂矣其後
仍注賜必大三字加御寶烏朱墨猶未乾也臣伏思
元祐中太宗皇帝嘗書居易紫薇花絕句以寵學士
蘇軾今臣亦拜樂府之賜雖庸愚不肖視前人無能
為役然兩朝相望殆且百年聖心所屬其揆則一意
者以居易為元和學士時非特文字過人而忠純諒
直自能光明厥職後世惟軾為無愧故欲下臣師慕
兩賢之萬一以為報答效歟臣既摹刻之石俾有目
者咸仰聖天子游藝入神動存至戒又略記摹刻於

後使萬世而下知聖學淵懿仁民愛物高出帝王之
表蓋如此若夫陛下功德兼隆同符太宗天下將誦
而歌舞之固非臣謇訥所能宣也翰林學士中奉大
夫知制誥兼侍讀兼太子詹事兼修國史管城縣開
國子食邑五百戶賜紫金魚袋臣周某謹記
序

淳熙六年

論文海命名劄子

臣準省劄備奉聖旨以呂祖謙編類到聖宋文海令臣
撰序臣仰惟陛下當宵旰勵精規恢大業日不暇給之

際猶以餘力垂意本朝名士之著述特命館職精加採
取類為一書將與文選文粹並傳永久其加惠于斯文
甚厚臣雖骫骳不才無以序前人所為作者之意然叨
塵詞禁恭值陛下觀乎人文以化成天下紀事之端固
其職也但臣伏思文選文粹者皆以精擇為義而江鈿
所編頗失之泛故其命名有取于海今若襲而用之似
未足以仰副隆指謂宜出自淵衷別賜一字以詔來世
或恐不必上勤肆筆即願令宰執商量擬進仍以皇朝
二字冠其上用示悠遠無疆之意臣當推廣聖意擬述
序引恭俟制旨臨定伏取進止

繳進文鑑序劄子

臣近者恭奉聖旨撰皇朝文鑑序臣竊惟聖朝文章之
盛遠過前代陛下既命採擇其菁華仰以備乙覽俯以
幸學者宜有高文為之序引以敷達聖意而臣適在翰
苑猥當執簡聞見淺陋語言荒蕪勉塞明詔無所逃罪
其序文今已撰成謹錄封進臣無任慚惶兢懼之至取
進止

皇朝文鑑序

臣聞文之盛衰主乎氣辭之工拙存乎理昔者帝王之
世人有所養而教無異習固其氣之盛也如水載物小

大無不浮其理之明也如燭照物幽隱無不通國家一有殊功異德卓絕之跡則公卿大夫下至于士民皆能正列其義餒飾而彰大之載于書詠于詩略可考已後世家異政人殊俗剛大之不充而委靡之習勝道德之不明而非僻之說入作之弗振也索之易窮也譬之盪舟于陸終日馳驅無以致遠搏土為像丹青其外而中奚取焉此豈獨學者之罪哉上之教容有未至焉爾時不否則不泰道不晦則不顯天啟藝祖生知文武取五代破碎之天下而混一之宗雅黜浮汲：乎以垂世立教為事列聖相承治出于一援毫者知尊周孔游談者

羞稱揚墨是以二百年間英豪踵武其大者固已羽翼六經蒸飾治具而小者猶足以吟咏情性自名一家蓋建隆雍熙之間其文偉咸平景德之際其文博天聖明道之辭古熙寧元祐之辭達雖體制互興源流間出而氣全理正其端則同嗟乎此非唐之文也非漢之文也實我宋之文也不其盛哉皇帝陛下天縱將聖如夫子煥乎文章如帝堯萬幾餘暇猶玩意于衆作謂篇帙繁夥難于徧覽思擇有補治道者表而出之乃詔著作郎呂祖謙發三館四庫之所藏裒摭紳故家之所錄斷自中興以前彙次來上古賦詩騷則欲主文而譎諫典策

詔誥則欲溫厚而有體奏疏表章取其諒直而忠愛者
歲銘贊頌取其精愜而詳明者以至碑記論序書啟雜
著大率事辭稱者為先事勝辭則次之文質脩者為先
質勝文則次之復謂律賦經義國家取士之源亦如采
掇畧存一代之制定為一百五十卷規模先後多本聖
心承詔于淳熙四年之仲冬奏御于六年之正月賜名
皇朝文鑑而命臣為之序臣待罪翰墨識才驚下固無以
推原作者闡繹隆指抑嘗竊讀大雅之詩而知祖宗所
以化成天下者矣械樸官人也旱麓受祖也辭雖不同
而俱以遐不作人為言蓋魚躍于淵氣使之也追琢其

章理貫之也况夫雲漢昭于上豈第施於下濟多士
其有不觀感而化者乎是則祖宗啟之陛下繼焉樂文
王之壽考申太王季之福祿人才將至于不可勝用
豈止乎能文而已臣雖不肖尚當執筆以頌作成之效
云臣謹序

玉堂類稿卷第四 終

賜端明殿學士左中奉大夫知平江府汪應辰
乞除一宮觀差遣不允詔 八月七日

朕宵旰圖治所賴以宣布德澤者繁良二千石是望既
延見訪問以精擇于初又增秩賜金以久任于後凡以
為民也如卿豈弟忠信侍朕有年德意志慮宜知之矣
出臨吳會曾未數月民隱甫恤吏姦甫戢上書求去其
義安在夫守方賢而遽易固非朕指政垂成而輒棄卿
亦奚取此哉姑安厥官慰彼黎庶

賜敷文閣直學士降授左朝請大夫晁公武辭
免知揚州恩命乞除一在外宮觀不允詔 八

月七日

卿昔任言責廣朕聰明旋陟民曹叅予侍從渡瀘鎮益
又乞外庸萬里召歸固當留以自近會江浙擇牧思得
卻穀詩書之帥羊祜威信之守茲為重寄今以付卿謂
宜疾驅以寬憂頌敷上祠請非予所知

賜右朝議大夫曾懷辭免除龍圖學士知婺州
恩命乞一宮觀差遣不允詔 八月二十二日

久勞暫逸者臣子之至情入從出藩者朝廷之異數既
進退之無愧宜恩榮之有加卿自寘周行即司邦計深
達通變之術兼明取予之方六年于茲多績用懋曳履

正資于獻納需頭屢丐于退閑冠西清嚴近之班付東道蕃宣之寄裕民足國已晞晏翼之功宣化承流尚跂龔黃之政悉心思報避寵何名

賜左中奉大夫行司農少卿韓彥直辭免特換

觀察使知襄陽府恩命乞許以舊官任使不

允詔 同前

廉車本唐十道採訪之官初無文武之別也祖宗時錢若水以執政舊臣王嗣宗以中司峻望李維以禁林舊德皆易此官中興以來嘗有自次對而得者當時猶謂之優焉今朕以卿智略疏通性資靜重徧更外計綽著

多庸故由列寺介卿特加超拜緊之近比寵數愈優峴首被邊號為重鎮往宣威信勿事謙辭所請宜不允

賜徽猷閣直學士左朝請郎知太平州周操辭

免改差知泉州恩命乞改除一宮觀不允詔

八月二十五日

卿公忠端亮久簡朕心豈弟廉勤數騰郡最以明而陟改鎮大藩既答民庸且彰異眷引年罷守本抑常材若夫政績著聞風猷克壯則雖庶僚有不得去者矣况吾法從之儁老哉卿其勿疑亟服新命

賜徽猷閣直學士左朝奉大夫周操再辭免知

泉州及奏事恩命乞改除一宮觀差遣不允

詔 九月十六日

卿以侍從之良而名在諸侯之選易州趣覲蓋將聞嘉猷詢民瘼也而卿前既引年今復辭疾殆異乎國體之誼矣其重賜璽書以著予意匪常禮也朕于卿簡眷如此卿得不為朕一行乎

賜左正議大夫蔣芾再辭免新除觀文殿大學士知紹興府恩命不允不得再有陳請詔

成王之封召伯憇南國而教明康侯之命畢公釐東郊而道洽皆籍大臣之望用形九牧之風今朕起卿實惟

稽古開近畿之鉅鎮加祕殿之大名素冠纁：矧終于禮制赤舄几：佇見于儀形何未踰于眷懷乃游披于遜牘具遵初詔允迪前良

賜觀文殿大學士左光祿大夫知福州陳俊卿

乞改除一在外宮觀差遣不允詔 十月

朕待舊弼之禮甚厚擇帥守之任甚艱屬者以四千石之重俾卿畫繡而歸豈特敬故保庸合周官八統之馭亦惟七閩父老子弟知吾以相臣為鄉部之寵庶幾歆羨告語勉于為善則一道雖遠可不勞而治也謂體此意往綏厥官諗疾之章何為遽上傳曰不使大臣怨乎

不以况我潜藩之故舊乎卿未可以家食也

賜徽猷閣直學士左朝奉大夫新改差知泉州

事周操乞除改宮觀差遣不允詔

朕惟泉南大藩遠在閩徼遴擇師帥莫如卿宜而懇避之章一再不已昔卿未至引疾可也今既見朕矣精力之強不異曩時其可遂卿雅志乎勉為朕行毋數勤詔論也

賜觀文殿學士左宣奉大夫提舉臨安府洞霄

宮魏杞辭免差知平江府恩命不允詔

朕觀唐虞之世內有百揆四岳外有州牧侯伯故能和

庶政而寧萬國今朕起弼諧之舊任藩宣之寄用此道也惟卿令德孝恭繼君陳之美威儀維則有魯侯之風吳門大邦容適王室益精擇而後用豈謙辭所能避哉亟其來思惠此千里

賜左朝散郎試中書舍人兼侍講兼直學士院

鄭聞辭免新除禮部侍郎依舊兼直學士院

恩命不允詔

朕惟秩宗典樂舜命二人成周雖合于春官然大宗伯大司樂亦分二職今儀曹兼掌斯事任加重矣朕既置其長復立其貳倣古誼也卿以通才與學嘗總夷夔之

職粵司名命益為國華庸正貳卿俾續前業願郊禋密
適禮樂之用為急使朕接三神之歡或一代之典正有
賴于博洽而又何遜焉

賜敷文閣直學士右承議郎知明州兼沿海制

置使趙伯圭乞除一在外宮觀差遣不允詔

十月五日

朕聞太守吏民之本數易則下不安故雖遐方支郡猶
擇人而久任况近畿鉅藩控制海道如四明者乎卿大
雅不群居官可紀再分符竹治效益彰謹身帥先如文
翁之守蜀足用愛民如僖公之保魯父老方借留不釋

而朕輕許其去可乎毋棄爾成以究循吏之績

賜左朝請郎試尚書戶部侍郎江浙京湖淮廣

福建等路都大發運使史正志乞守本官職

致仕不允詔 十月五日

朕迺者發官以示四方庶幾大易理財之義虞書養民
之政復見今日卿由侍從首在選中亦既宣勞方期底
績乃因奉計遂欲告歸是豈朕責成之指哉傳不云乎
禮義不愆何恤于人言卿其平心審思使國用足于上
民力裕于下稱朕意所請宜不允

賜復威武軍節度使左金吾衛上將軍李顯忠

辭免除主管侍衛馬軍司公事恩命不允詔
十月十五日

國以兵益強兵以將為命况夫總爪牙于圻父憲羽林
之壘壁委寄至重可輕授人卿沉毅忠勇見謂名將紹
興之末嘗典騎軍自朕纂承益加倚信與其執戈環衛
宣夙夜之勞孰若申命天營觀訓齊之效眾論惟允卿
毋固辭

賜左正議大夫守尚書右僕射虞允文辭免轉
一官加食邑一千戶食實封四百戶恩命不

允詔 十二月三十日

勅允文省所劄子奏辭免提舉刪修勅令書成特轉左
正奉大夫加食邑食實封恩命事具悉宰以六典佐王
周室乃成于邦治相以九章約法漢家遂協于時宜惟
大臣克念于兼三則多士自遵於畫一卷予賢弼力蹈
前修致君已展于謀謨定令更陳于綱紀成書來上一
覽甫周進階特獎于多庸加地更隆于異數既廷揚之
眾允矧面諭之素孚毋費謙辭趣承寵命所請宜不允
賜左承議郎權尚書工部侍郎兼侍講胡銓辭
免除工部侍郎恩命不允詔 十一月二十一日
汲黯在漢謀寢淮南隨會仕晉盜奔秦境本朝尊用告

士分治六職庶幾逆折姦萌而使幸民退聽非必專以
事諉也如卿堅強肅括輔之文學忠言竒論老而不衰
再儀周行侃然從近臣之後朕每嚮焉就正二卿益優
宿望卿其益勵壯志自同古人副朕所以眷待之意尚
何辭之有

賜尚書右僕射虞允文辭免提舉詳定一司勅
令恩命不允詔 十一月二十六日

周太宰以法待官府之治繫之天官今朕欲仍舊貫講
明百司之法而自公府及吏銓始蓋古之遺意也卿以
經術斷國論賢業熙帝載提綱于此位實值才傳曰三

公佐天子平邦國無所不統卿乃以總他職為辭無乃
異乎况朕稽用已行之典高卿相遜之風特詔克家貳
其事矣協謀合慮亟成新書庶幾乎成周不其休哉

賜叅知政事梁克家辭免兼同提舉詳定一司
勅令恩命不允詔

法令者治之具也朝廷者百官之表也惟憲度著明
于上則紀綱不紊于下今朕復故事定章程始于臺省
達于有司蓋將為一代不刊之典非吾執政誰與議此
卿以儒猷久飾王度以智謨叅穆天緯與提綱領允謂
當仁而况並命宰輔非特天聖以來為然在紹興時或

以疑丞或以宥密視諸故府具存近規出位為辭非所望于卿也所請宜不允

賜皇子雄武軍節度使開府儀同三司慶王愷

辭免加食邑食實封恩命不允詔十二月九日

朕乃者躬執珪幣郊見上帝誠意昭格風雨時若美光休應集于中壇方推大賚以及四海况我父子之親真王之貴重嘉觴之獻單駮犇之勞允所謂温恭朝夕執事有恪者也其何愛多戶之封不以廣龐鴻之施乎夫慶賜之行自親以及疎由貴以及賤此先王之典也可無復辭所請宜不允

賜觀文殿大學士左光祿大夫知福州陳俊卿

乞改除一在外宮觀差遣不允不得更有陳

請詔同前

民惟邦本：固邦寧岳牧之官其敢不重近者起一二舊相鎮臨藩服庶幾倡率郡國與我共理如卿早傳潛却徧儀述列比辭宰事寵畀帥權因該輔之久則志易孚順故鄉之俗則政易治朕方嘉卿夙夜匪懈不以大神臣自居推我惠心致之閩嶺而曾未期歲求去者再甚無謂也昔汲黯多病猶能卧治東海卿其可以微疾為辭乎况朕推誠無疑篤股肱之舊而卿何不自信引桑

梓之嫌姑安厥官毋替朕命

賜左中大夫參知政事梁克家辭免進封清源

郡開國侯加食邑食實封恩命不允詔

朕承天命之序饗帝于郊不敢恃犧牲黍稷之豐而所
竭者誠不敢矜玉帛鼓鐘之備而所修者德荷神靈之
昭格慶典禮之備成否擁純禧徧敷黎獻卿勵志許國
同寅惠疇匪惟講明三歲之彌文實亦啟迪一純之精
意相予肆祀具宣登降之勞賚我思成宜共休嘉之福
封徹侯于故郡陪多賦于上腴鴻霈所加朕豈有徒施
之惠顯庸斯稱卿固無虛受之嫌其體眷懷勿堅冲尚

賜皇兄檢校少保岳陽軍節度使開府儀同三
司充萬壽觀使永陽郡王居廣辭免加食邑
食實封恩命不允詔 十二月十四日

朕誕受帝祉敷錫中外以王屬近位高在顯相之列均
釐加地其說益有三焉親：仁也貴：禮也富善人義
也制書既下可以謙辭而中格哉

賜太尉保信軍節度使充萬壽觀使鄭藻辭免
加食邑食實封恩命不允詔

郊恩廣矣無親疎無大小內外咸暨一焉卿地則懿戚
位則掌武祿則秘祠此固慶澤所宜先者矧朕親駕郊

廟之夕卿實宿衛宮省使吾不內頌而盡敬于酌獻厥功茂矣其可辭賞乎

賜左朝議大夫黃中辭免除顯謨閣學士在外宮觀恩命不允詔 十二月二十二日

朕以卿有次公之溫良叔度之深遠直諒多聞昔為益者之三友爵齒有德今號天下之達尊故起之暨老幾以自近而卿深惟止足之義重于朝請之勞數上書求去朕不得而留也文謨峻職真祠厚祿不如是無以旌朱印之舊遂赤松之遊常格云乎哉所請宜不允

賜皇弟少保靜江軍節度使判大宗政事恩平

郡王璩辭免加食邑食實封恩命不允詔 十

二月二十二日

朕乃者迎日之至三修郊類戰：兢：懼無以承天地之况合祖宗之心而假廟之夕象載昭察升燎之際衆星留俞頌朕不明其何以臻茲亦惟爾王公卿士秉德助祭之效也詩不云乎豈伊異人兄弟具來胙祉所加孰先同姓抗章辭邑非體朕親睦之意也

賜昭慶軍節度使致仕劉懋辭免加食邑食實

封不允詔 十二月二十六日

朕歌成命之頌而單夙夜宥密之心詠思文之章而懷

立我蒸民之德精神乎達瑞應紛委歛敷慶澤中外胥
及粵吾一二告老之臣名在戚里家擁旄節可獨遺乎
夫均惠所以推天地之况篤舊所以廣祖宗之仁事異
勸勞朕非以是私卿也

乾道七年

賜皇弟璩再辭免加食邑食實封恩命不允不

得再有陳請詔 正月三日

朕峻立澤之祠篤邦家之慶並宗冊寶尊我庭闈加錫
金贈惠于文武惟時介弟慕昔賢王率麟趾以駿奔服
貂冠而顯相拓其奉邑壯乃宗盟均福展親義可承而

難避執謙辭富章既却而復來雖諒忱言莫回 渙命
請宜不允不得再有陳請

賜龍圖閣直學士右朝議大夫知婺州軍州事

曾懷乞除一在外宮觀不允詔 正月十日

卿心計有餘而能以損下益上為戒當今理財殆未有
出卿右者拜州累月朕注想焉驛召而來將復付以足
國裕民之寄其可言去乎勉悉爾心即頌寵命所請宜
不允

賜右中大夫充徽猷閣待制新除知荆南府姜
詵辭免除敷文閣直學士恩命不允詔 正月

二十五日

卿宣城之政號稱勤敏當積潦之後有振廩之功可稽
涉明以勸能吏矧祖宗甚重邊帥率進職以寵其行今
吾荊州蔽巴蜀控襄漢帶沔鄂任加重矣可無褒乎西
清進班所以錄前勞賁新組也尚體至意毋為遜辭所
請宜不允

賜龍神衛四廂都指揮使廣州觀察使趙樽再
辭免除昭化軍承宣使恩命不允不得更有

陳請詔 正月二十六日

卿守邊日久軍政修明進階承流庸以示勸此六年正

月之詔也今彌歲矣乃上章固避至七八而未正是豈
稱朕急于第功之意哉面諭已享亟恭前命

賜復慶遠軍節度使差充鎮江府駐劄御前諸
軍都統制成閔辭免加食邑食實封恩命不

允詔 二月二日

朕籲俊以尊上帝非惟常伯常任是賴亦惟虎賁之長
越在外服簡恤爾士尚迪果毅以登乃辟肆予一人汝
嘉用承天休賚爾多邑誕告有衆咸曰允哉毋或固辭
共朕之詔所請宜不允

賜皇子鎮洮軍節度使開府儀同三司恭王其

辭免立為皇太子恩命不允詔 二月九日

朕觀夏商而後唐漢以還率當國家間暇之時預選社稷久長之策古以為重朕安敢輕以汝符采昭融性資英敏早辨南陽之牘深窮東序之經素簡朕心灼知厥德用協本朝之茂憲載行至道之盛儀詔以揚庭命之貳極益兼採親賢之望願豈專父子之恩永肩忠孝之圖勿徇謙冲之節

賜成閔上表再辭免加食邑食實封恩命不允

不得再有陳請詔 二月十八日

王者公子奪以馭臣人臣明辭受以事上古今之通誼

也日朕躬郊拜况均惠文武有懷宿將搃戎于外雖無侍祠之勞而有制閫之功載加多邑以溥吾恩非妄予也卿其可異眾而獨辭乎所請宜不允不得再有陳請

賜龍神衛四廂都指揮使宜州觀察使主管侍

衛步軍司公事王友直辭免陞侍衛親軍步

軍都指揮使恩命不允詔 二月二十一日

朕謹操八柄以馭群臣凡厥賞刑眦夫功過卿治軍有律事上不欺顯示朕恩就升使範既為爾寵亦勸其從宜即欽承勿勞遜避所請宜不允

賜皇子魏王愷再辭免依文彥博例宴餞于玉

津園恩命不允詔 二月十四日

昔宣王能錫命同姓詩人美之曰韓侯出祖出宿于屠
顛父餞之清酒百壺此中興盛禮也今吾真王之貴分
近輔之符百籩郊餞所以敦天性示慈惠也稽之在昔
恩禮愈隆尚其拜嘉光乃行邁

賜左中大夫參知政事四川宣撫使王炎乞罷
機政并解使權除一在外宮觀差遣不允詔

二月二十八日

卿以廊廟之資置行臺于蜀二年于茲矣農田有秋邊
鄙不聳朕固寬西顧之憂而亦懷卿賦東征之歸也特

以宣威任重謀帥才難煩我近弼良非獲已且民心既
服卿豈不欲圖其寧軍政方修卿豈不欲底厥績其可
如一介之臣輕議去就乎益壯爾猷行受吉甫之多祉

賜利州觀察使韓彥直辭免除鄂州駐劄御前

諸軍都統制恩命不允詔 二月二十八日

唐之雅曰惟西平有子惟我有臣將門擇將自昔然矣
惟乃先著勳列于王室世選爾勞庶其在茲矧卿智略
毅猷見于總賦之日就拜大將一軍何驚焉勉圖功名
安用辭避

賜參知政事梁克家辭免兼權知樞密院事恩

命不允詔 三月十一日

卿醇明通達夙被簡知自陟政塗即迭貳鈞樞之任朕意亦可見矣茲者特起舊人通知兵柄卿是以有前日之請然而籌帷之官尚或虛位朕是以有翼日之詔蓋控辭者卿之志也申命者朕之本心也既以兩得奚為自疑

賜皇太子辭免立妻李氏為皇太子妃不允詔

三月三日

朕居念永圖勳遵成憲知子莫若父既毓德于春闈治國先齊家復正名其嘉耦益禮容之異數則位序之同

升國有榮懷往無辭避

賜定國夫人李氏辭免立為皇太子妃不允詔

三月三日

朕觀易象以正家人玩禮經而明內則眷時令婦久媿嗣賢既靜順以修身亦虔共而佐餽茲宏開于儲禁爰並錫于徽章允協舊規盍蠲冲節

賜明州觀察使張說辭免除安慶軍節度使提舉萬壽觀加食邑食實封恩命不允詔

卿久在樞庭日承密旨邊防軍政既與聞之比名超遷其實因任願乃逡巡辭位莫得而留畀之將旄優以祠

廩既曲從于卿志亦因哂于師言朕于適臣可謂進退有禮矣卿猶固避不已過乎

賜觀文殿學士左宣奉大夫知平江府魏杞乞除一在外宮觀不允詔 三月二十六日

朕愛民甚所賴于惠養而訓道之者不在良二千石乎卿以孝友忠信宣茲明允起臨近輔庶達朕心既勤勞於初當優游于後十旬遽去人謂斯何仲弓曰居敬而行簡以臨其民允蹈格言汜成靜治所請宜不允

賜草土劉珙辭免起復除同知樞密院事恩命不允詔 三月二十六日

卿文武憲邦朕所注想屬聞罹親憂釋閭寄朕未忍下奪情之詔者知卿送終之心切也今卿哭踊有節少抑門內之恩窀穸無違足伸人子之孝起任吾事茲其時乎况當朕焦勞之秋欲咨卿軍旅之務從權合禮何名教之虧移孝而忠何風化之薄勉興塊次來贊前籌所請宜不允

賜顯謨閣學士左中奉大夫知渾州沈介辭免召赴行在乞改除一宮觀差遣不允詔 三月

二十六日

卿清明敏達輔之學術益國家之寶臣也往者藉其才

付以方面今者閔其勞命之來朝朕待臣工亦云至矣卿久去侍從獨不思奉三年之計且告我以嘉謀嘉猷乎抗章辭行非不俟駕之義也佇前朕席宜疾爾驅所請宜不允

賜觀文殿大學士左正議大夫知紹興府蔣芾

再上劄子乞除一在外宮觀差遣不允詔三

月二十八日

卿德善在躬寬而有制比席衮衣之貴懷會稽之章布宣恩威人以畏慕薦求自佚殊非朕心惟爾曾門暨乃祖乃父或以方略為帥或以廉清號良守推爾家法又

吾軍民豈惟予一人以寧時亦昭乃世德尚體茲意毋勤再三

賜敷文閣直學士王十朋辭免除太子詹事恩

命乞依舊奉祠不允詔 四月五日

朕深惟三代長久之道豫建太子又擇名卿宿儒為之衛翼所以尊宗廟重社稷也卿清明諒直海內寡二頃由三館以經術從吾兕遊茲啟承華命居端尹是資正論益廣前聞卿疾既平強為我起所請宜不允仍依已降指揮疾速前來供職

賜福州觀察使提舉佑神觀魯覲辭免特與轉

行一官恩命不允詔 四月七日

惟予賢子昔在幼學春誦冬讀詔之有人逮茲升儲隆我國本推恩篤舊厥有故常按籍序遷卿其一也理無可避往即欽承

賜左中大夫叅知政事四川宣撫使王炎上表再辭免進封清源郡開國侯加食邑食實封恩命不允不得再有陳請詔 四月十二日

朕迺者不受牲玉躬秩元祀於穆清廟時則來多士之助敬事上帝時則有三俊之功慶賜所加遠邇如一眷言哲輔為朕倚毗賦政于外方資山甫之喉舌用錫爾

祉宜廣召公之土田惟君命之不可稽惟神釐之不可拒遠勤遜牘殊拂予心所請宜不允

賜左中大夫給事中王曠辭免除翰林學士命乞除一在外宮觀差遣不允詔 同前

卿蚤由推擇進直搗文出入禁塗今二十載非特詞章之麗素簡朕知至于官簿之優誰居卿右逮茲顯拜寧復間言况朕臨御以來用內相總數人耳一時髦士預選為榮三入承明在卿尤寵方觀鴻筆宜略搗章所請宜不允

賜敷文閣直學士左朝議大夫知揚州晁公武

辭知潭州不允詔 四月十三日

勅公武省所劄子奏辭免改差知潭州恩命乞檢會前奏除在外宮觀事具悉長沙昔稱都會連帥今搃兵民生齒夥繁夷獠被邊自非仁以撫之義以制之其不乏吾事者幾希卿屢劄州符三分閫計政遠寬猛在循吏之日孔子曰如有所譽其有所試卿于宅牧可詳試矣朕命維允爾行勿遲

賜敷文閣直學士左朝議大夫知揚州充淮南

東路安撫使晁公武乞除一在外宮觀不允

詔 四月十五日

朕勵精庶政夙夜不敢康亦惟州牧侯伯推惠澤而致之民以協贊予治卿奮由儒術見謂吏師服在近班數更守帥疇庸淮海易鎮湘流甫下璽書日遲去觀叢祠之請徒費爾辭

賜定武軍承宣使安定郡王令德辭免除知南

外宗正事恩命不允詔 同前

堯明峻德九族以親今朕擇宗室之老分治同姓亦帝堯之意也卿蚤從官政晚襲王爵富義理之閱無侈驕之期必能睦族以恩率下以正勗謀惟允辭避何居

賜皇子雄武保寧軍節度使開府儀同三司判

寧國府魏王愷辭增供給錢等不允詔 四月

十八日

勅愷省所劄子奏乞免每月支給錢五百貫文并本府一行官屬月支供給各有差事具悉地親者恩宜厚位重者祿必豐既以辨儀亦惟馭富嘉予賢子殿乃名藩爵已極于真王禮當殊于方郡優加餼廩固周邦宗子之城賚及陪臺異漢室左官之律其祇朕眷母執而謙

賜新除翰林學士左太中大夫王曦辭免除兼

侍讀恩命不允詔 四月十九日

入儀經幄均用時髦然勸講者猶有分章析理之勞進讀則專以因事獻言為職每艱選任必屬耆英卿比自夕即來陪晝訪眾謂儒林之先進朕嘉法從之老成既真鼇禁之除宜冠金華之席雖循故事實茂新思其務廣于緝熙毋過形于謙遜

賜徽閣猷直學士左朝奉大夫提舉江州太平

興國宮周操辭免除龍圖閣直學士恩命不

允詔 五月五日

卿剛毅簡廉宣慈明敏立朝著不欺之節治郡推愛人之心甫鎮清源遽移霜露之疾重以民事櫻吾耆老進

職四拔俾為奉祠之光祇服異恩毋煩冲避

賜觀文大學士左光祿大夫知福州陳俊卿

辭免加食邑食實封不允詔 五月九日

朕乃者裸黃流于廟颺高煙于郊祖宗頌歆天地並况
嘉與中外同其福祿卿秉德蹈義嘗亮于米偃藩南服
職貢甚脩既考上儀肆加奉邑非特示均釐之意亦以
疇助祭之庸並其欽承毋格明詔

賜觀文殿大學士左光祿大夫知福州陳俊卿

辭轉官不允詔 五月十三日

勅俊卿省所劄子奏辭免收捕海賊倪即等了當特轉

一官恩命事具悉屬者姦毗航海出沒風潮間鈔賈舶
擾島民釋而不誅殆且滋蔓卿能督勵將士以時蕩平
朕甚嘉之方詔有司條上功狀譬之獵烏發縱指示之
庸不可以不先也卿其亟服新命使爾衆知朕信賞如
此賈其餘勇剏殄逋寇俾無遺育尚何後患之虞哉

賜侍衛親軍步軍都指揮使宜州觀察使王友

直辭免除殿帥不允詔 五月二十五日

勅友直省所奏辭免除主管殿前司公事仍乞檢會前
奏除一在外宮觀差遣事具悉朕既分命猛士以守四
方又萃天下武鋒而為周廬之衛若時擇帥其重可知

卿沉毅有聞久司禁旅巖除缺長肆命晉遷夫志功名者常患無時懷忠義者當思報主求間避寵豈所望于卿哉

賜侍衛親軍步軍都指揮使武昌軍承宣使吳

挺辭免除步帥不允詔 同前

勅吳挺省所劄子奏辭免除主管侍衛步軍司公事恩命事具悉朕厲武經修軍政雖千夫長百夫長猶審擇而後用况乎總七萃之重護九重之嚴非吾信臣孰寄心膂以卿家世忠義見聞方略召居環列益觀爾能擢典衛兵蔽自朕志勉圖稱塞何以辭為

賜李顯忠辭免特復太尉恩命不允詔 六月四日

勅顯忠省所劄子奏辭免特復太尉恩命事具悉周命六卿圻父師爪牙之士漢分三府掌武與居一為古今沿革雖殊其為重任均也卿方以沉鷲忠實領萬騎于天營之內茲復深加異數還畀自上安下之職庶幾因名而責實鑒舊而圖新也勉期功名奚必冲避所辭宜不允

賜左中大夫參知政事四川宣撫使王炎再乞

在外宮觀差遣不允不得再有陳請詔 六月

卿屬者上書移疾祈釋邊寄朕惟信順者天人之所助

正直者神明之所聽如卿股肱近弼與國同體其賢可尚匪息之安積勤愆和何慮不已重書諭旨今甫決旬囊封繼來嘉聞治事之語其可求代乎且充國疾留西陲裴度卧護北門皆無後艱以有終吉卿其總大體略細務時節炎涼輔近服食俾躬有瘳稱朕意焉所請宜不允

賜端明殿學士左中大夫知太平州洪遵辭免

知建康府恩命乞除一在外宮觀差遣不允

詔 六月十二日

厥今重鎮莫如秣陵異時謀帥多取正塗之舊非特藉

賴威望填臨兵民亦惟嘗侍帷幄知德意志慮之詳焉卿文學政事著于中外當塗分守尤號循良寬吾顧憂無易卿者夫由諸侯而列方伯釋銅魚而佩玉麟固足以為吏士之光矣况乎扮掄故鄉近在封部之間哉勉稱恩榮毋煩遜避

賜鄭藻辭免除開府儀同三司加食邑食實封

恩命不允詔 六月十五日

朕聞外姻之籍懷諸后之家如卿歷事四朝號稱耆舊凡今戚里誰與比倫而况尉府十年無瑕而有譽進隆命數禮亦宜之不然衮衣繡裳視秩三事朕豈輕以假

人也哉已告大廷毋勤遜牘

玉堂類稿卷第五終

玉堂類稿卷第六

周益文忠公集一百六

賜臣僚請免詔二

乾道七年

賜草土劉珙三上劄子辭免起復恩命乞早賜

抽還中使徐偁不允不得再有陳請詔 六月

二十三日

朕乃者起卿以西樞付卿以上流手札丁寧馳遣誓御
所以示必用者蓋有三說軍旅為今重事理可奪情公
侯以國為家義難有已一也維乃祖父忠槩有聞何以
似之莫如移孝二也卿比鎮荊州按行襄漢規模甫定

未迄于成今不强起孰卒吾事三也而卿連章累牘不
過以名教為疑夫無故而自請短喪宰予所以獲罪有
為而要經服事閔子所以合禮漢儒之傳寧無據哉且
本朝特起故事非但執政而已文翰近臣如王禹偁楊
億輩皆不得已勉共上命當是之時中外豈不綏靜彼
二臣者學識豈不高明矧在于今尤難執一並承委重
之意毋蹈辭難之嫌所請宜不允

賜觀文殿大學士左光祿大夫知福州陳俊卿

再辭轉官不允詔 六月二十四日

勅俊卿省所劄子奏再辭免收捕海賊特轉一官恩命

事具悉卿夙推德望常翊乾台豈必計功而後增秩頌
朕方大明黜陟砥礪中外卿于此時宣國威靈俾海道
肅清姦宄懲艾厥績茂焉進階一等倡吾九牧匪直為
卿寵也書不云乎德懋：官功懋：賞朕惟兼用卿復
何辭所辭宜不允不得再有陳請

賜草土劉珙允詔 七月八日

勅劉珙省卿四上劄子辭免起復恩命乞檢會前奏抽
還中使徐偁事具悉朕詠詩之雅有常德以立武事觀
易之象除戎器以戒不慮用是起卿則于奪情之典初
未為過而璽書屢下懇避 確重以疾諗諒非飾辭况

夫暴秋陽事道路使卿或愆調護之節寧不惻我心乎
俛聽終喪朕固靡忘于眷注也所請宜允

賜右朝散郎權尚書吏部侍郎王之奇辭免落

權字不允詔 七月十三日

勅之奇所奏辭免除吏部侍郎恩命事具悉維乃先正
甚文且武中興盛際蔚為名臣閱蘊僅施元身遽沒餘
慶所積在其後人卿洪毅精明力紹家學發揚普詡服
于禁塗典誥未幾人以為允因能而任就正貳卿成命
已行當仁何避所辭宜不允

賜侍衛親軍步軍都指揮使宜州觀察使主管

殿前司公事王友直乞宮祠不允詔 七月十

三日

勅友直省所奏乞除一內外宮祠事具悉朕于將帥審
擇之信任之固不輕以一毀一譽移也卿拱護殿巖未
再閱月何嫌何疑而遽求去夫奉法從事公爾忘私行
之有常人則誰怨姑安爾位毋拂朕心所請宜不允

賜左朝散郎致仕巫及辭免復龍圖閣學士恩

命不允詔 八月九日

朕乃者躬款泰壇備成熙事德洋恩普徧於遠邇惟時
共政之舊告老之臣固不可以一青遺也做加秘職盡

洗丹書夫身在林泉之間而名冠西清之籍寵章隆厚足耀垂車母或同辭亟承帝祉所請宜不允

賜觀文殿學士左通議大夫提舉臨安府洞霄

宮汪徹乞守本官職致仕不允詔 九月七日

卿厚重有常直方居簡進服廊廟謀猷允臧出臨藩維政事固欽奉祠養疾昔不得已而聽之今乃辭祿未及之年在卿止足之計則善矣獨不體朕眷：老成之意乎勉思自持毋或他慮所請宜不允

賜降授左中奉大夫劉章辭免除顯謨閣學士

恩命不允詔 九月二十七日

進而攝常伯退而直西清此故事也至于加峻職越舊班則絕無而僅有焉日者首賁黃中之歸今復用之榮卿之去非以二老嘗從我于潛藩乎惟卿文學之優志氣之裕正唯齒宿尚可告猷而曲折眷留莫回雅意光華均佚尚尉我心伐木之序不云乎不遺故舊則民德歸厚矣敬體優禮毋為遜辭所請宜不允

賜太尉昭信軍節度使致仕曹勛辭免落致仕

提舉皇城司恩命不允詔 九月三十日

知止者臣子之誼用舊者人君之仁卿祇事兩朝視儀二府初終無玷忠謹有聞昔聽其歸既彰冲尚今還以

位庸示眷懷亟彈已掛之冠勉竭未愆之力所請宜不
允

賜左中大夫參知政事四川宣撫使王炎辭免
除樞密使應干恩數並依宰臣恩命不允詔
十月二十八日

朕惟卿與學英才負名儒之望精忠閱慮有大臣之風
使蜀三年厥功茂焉幾廷闕長欲下來歸之詔者屢矣
而西南重寄弄印莫界故推殊渥未改行臺蓋位宗則
國體尊任久則士心附告廷之日搢紳黎庶咸曰允哉
朕亦自欣用人授任之兩得也茲觀來諗乃謂不皇安

者有五夫錄德定位非誤賞也以身殉國非市寵也朕
之名器其愈重卿之名節其愈光又况江表督師元樞
外拜隆興近制今實用之雖復力辭必成命之難回也
所請宜不允

賜起復左朝奉大夫充敷文閣待制樞密都承
旨兼戶部侍郎葉衡辭新除戶部侍郎不允
詔十一月九日

勅葉衡省所劄子奏辭免除戶部侍郎依舊兼樞密都
承旨恩命事具悉卿才華智略簡在予衷列職樞廷兼
官民部益綽乎其有裕也孔子曰足食足兵民信之

矣朕方與卿圖此三者是以事權雖舊而寵數則新尚
摠獻納之遠猷焉用辭遜之常禮所請宜不允

賜敷文閣直學士左朝散郎知成都府張震乞
除在外宮觀差遣不允詔

文學政事惟通才為能兼之卿頃在朕前有猷則告付
之征鎮何遠非宜邈是少城方安仁愛其可求代乎况
朕推誠無疑卿乃以嫌自引非所望也益勤宣布慰父
老子弟之心所請宜不允

賜敷文閣直學士右中大夫知荆南府姜誥辭
免昨任寧國府修圩岍轉一官恩命不允詔

十一月二十二日

增秩旌郡守漢制也而朕用之卿向治宛陵于農田益
宣力為隄防允修禾黍以茂今雖易鎮賞猶眡功茲用
不待三載亟考而績詔音既下願欲反汗邪所請宜不
允

賜四川宣撫使王炎再辭免除樞密使不允不
得再有陳請詔 十二月一日

國家右置鴻樞斡旋兵柄其倚綏之重圖任之艱方吾
宰司注意均也如卿文足以斷國論武足以苞天威萬
里護邊三年于此疇厥望實延登使聯雖未容借箸于

前蓋已類折衝于外朕志素定庶言亦諧固非以卿嘗
貢移疾之章而有是發中之詔也申言五說無乃過疑
朕既丁寧諭指明其不然矣遜函未已豈亮眷懷勉趣
欽承毋稽我惟行之命所請宜不允

賜翰林學士左大中大夫知制誥兼侍讀王曠

乞守本官致仕不允詔 十二月九日

卿靜重恭寬為時耆舊潤色帝制久而愈華進趨斯朝
老方益壯告歸之語胡為而至哉且禁林優游義理相
應固非有簿書期會之勞也尚詢黃髮毋跂二疎所請
宜不允

賜龍圖閣直學士左朝奉大夫提舉江州太平

興國宮周操辭免召赴行在不允詔 十二月

十九日

卿作德日休未嘗載偽故立朝則朕信之典郡則民安
之蓋簪橐之耆英播紳之令望也往聞嬰疾聽解郡章
今病愈可造于朝是以有賜環之命惟古之良臣乃心
罔不在王室雖千里不以為遠而况宗朝之近一葦可
抗乃欲辭行乎所請宜不允

賜左中大夫參知政事四川宣撫使王炎乞檢

會前後陳乞宮祠辭免新除樞密使不允不

得再有陳請詔 十二月二十五日

卿于役萬里厥今三年夷夏稔其風聲吏民懷其恩信
稽之公望宜式造衮繡之歸揆以人情難久詠裳衣之
制尚惟體國之有素雖復獨賢而弗辭乃涉春以來何
移疾之數旋觀手續益慨予心既懇還樞柄之崇復深
羨祠官之逸豈道之云遠未承前詔之諄：將禮有弗
周是使歸心之切：苟或異此奚為若斯朕方知臣下
之勤勞卿盍念功名之終始勉符推轂別佇賜環所請
宜不允

乾道八年

賜觀文殿大學士左正議大夫知紹興軍府事
蔣芾乞檢會前奏除一宮祠不允詔

正月七日

卿自去歲以來數移病告玆臺間館朕非有靳于卿也
願會稽輔藩徒得君重凡可以損公上之湏應州家之
用者請奏朝聞免符夕下卿既知之矣獨不能為朕少
留惠此一方乎昔汲黯多病卧閣歲餘而東海大治卿
之啟處視黯何如乃必欲還郡轂耶所請宜不允

賜光州觀察使高郵軍駐劄御前武鋒軍都統
制兼知楚州陳敏乞除一在外宮觀不允詔

正月八日

將帥貴久任收守戒數易朕于二者方謹守之卿入總
天營出臨邊閫厥有勤績著乎兵民徃城于方久念僕
夫之瘁共武之服尚圖王國之安遏爾歸心體予眷意
賜侍衛親軍步軍都指揮使宜州觀察使主管
殿前司公事王友直乞除一在外宮觀差遣
不允詔 正月十八日

朕以卿勁勇絕人擢司嚴陞謂當許國皇恤其他而未
涉三時繼有避嫌之請朕何賴焉且進而事君退而奉
親忠孝之道可以兩得求間雖切于義難俞所請宜不
允

十五日

賜敷文閣直學士右太中大夫提舉江州太平
興國宮方滋辭免知紹興府不允詔 正月二
在昔宣王采新田之芑惟時方叔壯元老之猷我圖牧
御之能亦取踐揚之舊卿器資寬裕識略精深久推政
事之才游履禁嚴之地安于祠館鬱乃眷懷遂荒大東
徃率從于海表戎有良翰諒咸喜于邦人亦既剖符毋
庸抗牘所請宜不允

賜虞允文辭免特進左丞相兼樞密使進封華
國公加食邑食實封恩命不允詔 二月十三日

朕以菲涼尊臨王公士民之上常懼歲月逾邁志勤道遠故
 妙簡忠良光輔不逮以卿碩德冠于當世淵謀合乎古
 人參稽師虞付以國政內之安百姓外之撫四夷上之
 調陰陽下之振法度朕既惟卿之聽卿亦惟力之竭此
 固朝野所共悉朕心所嘉賴也官名聲正就陟上台庶
 言允諧豈必辭避且大勲未集德化未成誠當今之急
 務卿嘗力啟朕矣得不自任以天下之重紹乃辟于三
 代之隆乎安分知止蓋眾人之事丞相奚為及此也所
 辭宜不允

賜梁克家辭免除左正奉大夫右丞相兼樞密

使進封清源郡開國公加食邑食實封恩命
 不允詔

朕之命相可謂不敢輕矣徐觀其事業詳試其謀謨逮
 夫德望已崇績效已著則信之不疑任之不貳夫豈偶
 然而已卿以英明冠多士精忠簡朕知不出都城遂間
 兩社其于彌縫庶政辨察百職功不少矣夫相有左右
 上應太薇之象下存歷代之規朕意素以屬卿故由更
 制而發號焉非可以謙辭格也若乃張紀綱變風俗暢
 國威蘇民力朕固日夜念此卿既言之則當成之庶幾
 畫責難之功而使朕獲任賢之福不亦臣主俱榮哉所

辭宜不允

繳張說王之奇辭免西府奏

乾道八年二月十六日準御封付院張說王之奇辭免各除簽書樞密院事奉劄子並奉御寶批降詔不允臣流落之餘蒙陛下收拾投拭寘在華近踰一年半矣碌：備位補報闕然夙夜慚懼無以自處倘有所見若又不言陛下雖欲赦之如衆論何臣竊見昨除張說簽樞舉朝皆曰不可陛下欣然聽納旋即改命魯未周歲復有此除群言紛：今猶昔也蓋以貴戚預政公私兩失不若坐享高爵厚祿之為安陛下神

聖固已洞照諒說亦自深曉此理何待臣言也若謂西府當問以武臣則願於大將中擇有威望可以運籌折衝者畀之誰敢異議臣非欲專任文吏也或云緣大臣薦用王之奇因而有此並命雖未可信然去年群臣爭論之際傳聞聖諭云茲事誠誤以此觀之用說非陛下意不為無據且當是時王之奇亦云曾入文字今却與說同升不知之奇以為是耶非耶恐亦未當遽受也臣在隆興初與說同侍殿陛近又與之奇同在六部情分頗熟素無嫌隙今非樂為仇怨自取擯斥蓋義所當言不得不効論思之萬一耳昔

唐元和間白居易在翰林奉宣草嚴綬江陵節度使
孟元陽右羽林統軍制皆奏請裁量未敢便撰本朝
元祐中師臣避免拜之禮執政辭遷秩之命蘇軾當
撰答詔亦嘗言其不可卒如所請今除用執政非節
度統軍免拜遷秩比也臣雖視居易軾無能為役顧
職守其可廢哉所有二人辭免不允詔書臣未敢具
草取進止

貼黃

臣竊觀國朝有宣徽南北院使班均二府地親秩重
文武大臣皆可為之陛下復古制若命討論用以

處說尤為優異未審聖意以為然否仰戴恩憐忘其
冒昧伏俟誅戮

是日聖旨與在外宮觀
又有旨今日下出門

淳熙二年

賜通奉大夫葉衡辭免差知建寧府恩命乞改

除一在外宮觀不允詔 九月十七日

卿材資雋明術業闡茂凡所甄擢率由簡知十年之間
遂寘台衮中道而去予心歎然錫之左符與我共理冀
宣惠澤庸副眷懷夫當軸于中賦政于外小大雖異其
可以報主知行所學則一也引疾為解朕何望焉所辭
宜不允

賜簽書樞密院事李彥穎辭免除參知政事恩

命不允詔 閏九月十九日

朕勵志滿微倚成四輔儀圖俊傑對司文武之權迭運
鈞樞稽合祖宗之制政路無曠朝廷自尊卿學富詞雄
體莊志裕恂：守道恥求世俗之虛名疊：告猷思獲
國家之元氣朕選于衆而知其可用斷于心而任之不
疑自亮采于幾廷曹宣勞于旬歲運籌合意具孚惟幄
之謀當軸處中宜贊廟堂之治在旋觀而已審奚固避
之能回所辭宜不允

賜翰林學士王淮辭免除端明殿學士簽書樞

密院事恩命不允詔 同前

朕寤寐英髦贊襄宥密非純成雅望何以鎮天下之浮
非沉識訂謨何以定帷中之畫廟勝所繫疇咨敢輕卿
德厚秉彝文醇貫道更歷紹興之言路允謂舊人考觀
近世之詞臣厥惟大手退食抱委蛇之節後明宣夙夜
之勞念久卷于皇猷宜預裁于兵柄且積中者名彰于
外而自後者人與其先予實汝知政將焉避毋確循于
冲守其亟翼于鴻機

賜資政殿大學士中大夫沈復辭免知鎮江府

恩命乞除一在外宮觀差遣不允詔 閏九月十一日

卿精明殫洽介潔簡廉萬里錫還言授之政而上書祈
免至于三四重違懇惻俾殿朱方借曰病哀猶當卧理
矧無他恙安用固辭勉佩印章體予眷頤所請宜不允
賜禮部尚書趙雄辭免兼侍讀不允詔 同前

昔元祐中名臣蘇軾以大宗伯進讀于金華拜恩之日
首陳六事著在方冊朕甚嘉之卿以蜀莊之珍傳揚雄
之學儼相如之文迪簡在廷華問彰徹侍言典禮榮計
前修詩不云乎高山仰止景行：止而又奚遜焉所辭
宜不允

賜中大夫參知政事龔茂良辭免修製加上尊

號寶冊了畢轉兩官加恩：命不允詔 係禮

儀使。十一月六日

天以無疆之體休敷佑我家丕延親壽予曷敢不鋪張揚
厲以對越景况乃仲冬日至親帥百辟並崇父母之榮
號金石在列冠劍在庭霽景曠溫群情悅豫歷觀書傳
所記蓋未有殊尤絕迹可比于今者也卿以鴻儒碩望
總領眾職淵原復貫既閑習乎禮文陟降多儀又厭服
乎觀聽進階加邑于理則宜且大典慶成熟云僭賞自
我作古寧問故事若 然辭之殆非股肱喜哉之誼也
賜參知政事龔茂良上表再辭免禮儀使轉兩

官恩命宜允詔 十一月八日

鏤玉揚徽慶太上歷年之永連珠告瑞遠仲冬朔旦之臨天人相應以在茲家國均休而未艾眷言近弼實贊昌期予欲新曠古之禮則汝明予欲展事親之儀則汝翼予欲播乾安坤安之樂于金石則汝聽予欲形天大地大之功于典冊則汝為底績居多遷官匪過而乃力避便蕃之寵面陳確至之言謂將豫昵于汝恩豈必曲從于前比先勞後祿素嘉儒行之優下濟上行滋嘆謙光之美方共由于此道姑勉徇于乃誠所請宜允

臣契勘故事在京臣僚上表辭免恩命若不允則降批答今來參知政事龔茂良辭免禮儀使轉兩官恩命奉御寶批降批答所請宜不允若依故事只當降詔臣今撰述書寫進入合依例請寶下本院給賜伏乞睿照

賜參知政事李彥穎辭免書撰冊文轉一官不

允詔 同前

內則父子外則君臣人之大倫也今者太上以仁聖綏壽報朕以孝敬極尊崇天人和同福祿並應父子之道備矣元首股肱相須成體則於君臣之際可不共其光榮乎卿以名世之儒義儀廊廟討論鉅典被飾厥文所

謂嚴樂之筆精淵雲之墨妙蓋兼之矣用是進秩不為
無名况朕寘卿四輔之列咨卿萬幾之事寵章徽數未
嘗有靳而獨愛此一官乎所請宜不允

賜端明殿學士簽書樞密院事王淮辭免篆寶

轉一官不允詔

朕登進輔臣周旋帷幄既不以一善為最又不以考績
而陟若乃國有大慶共其寵光則異數依加厚群臣莫
望斯名位之辨等威之制也屬者備物典冊增尊稱於
德壽閔休偉績振古未有濟：多士咸以列侍為榮時
卿名儒服在樞近允資鴻筆載琢斯章慶澤之行當由

貴始蓋有非常之功者必因夫非常之事有燦然之文
者必濟以懽然之恩典禮所闕卿固不得而獨避也所
辭宜不允

賜參知政事李彥穎上表再辭免撰冊文轉一

官恩命宜允詔 十一月十一日

昔大中祥符間執政王欽若陳堯叟皆以製述封祀壇
頌之功超進顯秩載在國史有榮耀焉今朕修稀世之
潤典加太上之顯號而卿以高文大冊發揮盛猷是用
倣章聖舊規循乾道近比進階四品庸答儒效而免章
沓至陳義益高謂朕方策勵事功愛惜名器而身參機

政宜率摯紳夫遜禮之主也謙德之柄也大臣如此足
勸多方豈以一官易茲二美敬從雅志良極嘆嘉所請
宜允

賜端明殿學士簽書樞密院事王淮上表再辭

免篆寶轉一官恩命宜允詔 同前

朕觀易之象曰勞謙君子萬民服也詩之雅曰行歸於
周萬民所望夫辭受明於上則廉遜興於下豈不所操
者約而所利者博哉日朕茂輯曠儀衍榮親之號而卿
實聯政路宣秉筆之勞越進文階將侈邦家之慶不獨
示卿之寵而已顧乃游形冲避且以名器為言蓋大臣
者民之表也故范宣子遜而其下皆遜是可化民成俗
矣朕雖欲不聽得乎所請宜允

賜資政殿大學士中大夫知建康軍府事劉珙

辭免起發本府教閱軍兵特轉一官許回授

不允詔 十一月十一日

卿名高九牧任重十連馭軍馳整暇之聲體國得忠勤
之誼歌周詩而遣戍既有成勞馳漢爵以賞功可無異
數故進階所以勸諸道而申命所以優大臣人皆曰然
卿尚何避

賜奉國軍節度使殿前副都指揮使王友直乞

除一在外宮觀差遣不允詔 十一月十六日

四牡之詩曰王事靡盬不遑將母此群臣宣勞於外懷
歸之辭也今卿以將帥之才為朕倚信擢居環尹閱歲
滋深夙興單衛上之勞退食享奉親之樂惟忠與孝寧
廢兼資苟勉勵之有加立功名其未晚所請宜不允

賜龔茂良辭免差權提舉編修玉牒不允詔 十

一月十八日

周用中士奠繫世漢晉命九卿典屬籍唐開成以玉名
牒至與史冊並驅是豈古今異轍哉法寔久而益章官
隨時而愈重故也况我國家發祥云遠祖功宗德視昔

有光文昭武穆與天無極則夫創寶藏之殿設纂修之
官總於柄臣理固當爾卿以經世之學華國之文參調
化元秉德蹈義兼領斯事益優為之豈以約史定令而
廢宏綱之舉乎亟其欽承毋格成命

賜李彥穎辭免差權提舉國史院實錄編修國

朝會要不允詔 同前

信史垂後世之法類書裒當時之事皆大典也自今熙
寧迄靖康有六十年未備之史則筆削不可以不嚴由
建隆暨紹興有八百編已成之書則會粹不可以不續
雖討論屬之諸彥而董正資乎輔臣卿學該古今文有

師法翊我機務言忠謨嘉舉茲以旃何職弗濟願豈不能據三長以總太史之任乎其趣汗音毋以遜避為也

賜降授朝散大夫權吏部尚書兼詳定一司勅令蔡洸辭免經修進吏部七司法轉一官恩命不允詔 十二月十六日

太宰以法待官府之治其來久矣卿以名德之裔簡于朕懷擢長天官實兼議令用詩書而輔法律蓋有家學存焉逮此奏篇灼知勤勸進階一等時乃故常夫手定章程職居銓綜制而用之謂之法既已與聞推而行之謂之通固將有望抗避寵其可曲從所辭宜不允

賜觀文殿大學士銀青光祿大夫知福州軍州事陳俊辭免起發禁軍土兵轉一官仍許回授不允詔 十二月二十一日

朕惟法等其功周勳以懋賞延於世舜德斯隆茲酌用於前規庸申哀於舊相卿久儀槐棘告惟幄之謀重填粉榆底藩維之績觀調兵之如約知制閫之宣勞增秩有差雖眦營屯之數移恩無間則隆體貌之私毋守一謙亟共再命所辭宜不允

賜安慶軍承宣使提舉德壽宮張去為辭免該遇德壽宮慶典轉三官依條回授恩命不允

詔 十二月二十四日

天錫太上純嘏眉壽無有害乃立春氣應歲禮于宮
掖肆大音于中外若時左右謹信之臣實宣夙夜奉侍
之力予維寵嘉之益慶澤之行職親者在所先歲久者
從其厚古今之通誼也又何疑焉所辭宜不允

賜少保岳陽軍節度使充萬壽觀使永陽郡王

居廣辭免加食邑食實封不允詔 十二月二

十五日

唐乾元間既加崇太上聖皇之號因肆音中外三品而
上賜爵有差今朕舉稀潤之典慶君親之壽甲午制書

推惠甚遠位隆屬近顧反不及耶增衍封租良不為過
尚有遜避之有所辭宜不允

王堂類稿卷第六 終

王堂類稿卷第七

周益文忠公集一百七

賜臣僚請免詔三

淳熙三年

賜新除少傅士輅辭免令所司擇日備禮冊命

宜允詔 正月十四日

延拜公孤具存故事蓋將涓選穀旦端委御朝擬金石
旅簪黻而後命之所以辨等列隆威儀也惟茲禮不講
為日已久庶因太上非常之慶褒錫宗室之老使在廷
之士有榮觀焉胡為抗章力斲寢免易不云乎勞謙君
子有終吉勉從冲守尚永迪壽祉之榮所請宜允

賜武康軍節度使捧日天武四廂都指揮使提
舉隆興府王隆萬壽宮吳拱辭免召赴行在
不允詔

卿深練武經克承世美久總師干之任比膺齋鉞之榮
固宜修玉觀之恭奚可遂家居之樂况朕每聞於鞀鼓
必念將臣如卿雖遠於江湖寧忘魏闕益思此義載疾
其驅所辭宜不允

賜皇子雄武保寧軍節度使開府儀同三司判
明州軍州事兼沿海制置使魏王愷辭免加
食邑食實封不允詔

朕惟太上皇帝盛德大業冠映往初眉壽隆名綿延億
載乃甲午詔書推慶澤於中外者博矣而况位重真王
任隆分陝是固恩徽所宜先也書不云乎身其康彊子
孫其逢吉尚奚遜焉所辭宜不允

賜皇子魏王愷再上表辭免加食邑食實封恩
命不允不得再有陳請詔

奉萬歲之觴歲盛儀於東內封三錢之府均大賚於多
方念我賢王適臨重鎮乃首敷於邦渙俾增入於戶租
非獨示親之之恩亦將明貴之誼是故兩得奚為屢
辭所辭宜不允不得更有陳請

賜龍圖閣學士承議郎提舉江州太平興國宮

胡銓辭免檢舉磨勘指揮恩命乞檢會前

後累奏許休致不允詔 二月九日

卿蚤持正論負九牧之名晚釋群經得先儒之旨養恬
真館冠職西清恩章所加度越諸老惟是階秩以稽勞
能而卿周旋議即殆四十載使踵長塗而序進猶當取
甘茂之十官况由禁路以陟明蓋屢計成周之三歲寧
容廉退獨不舉行削牘以辭既非所望遂欲致君事而
去是豈乃心王室之誼哉所請宜不允

賜趙伯圭上表再辭免除安德軍節度使提舉

隆興府王隆萬壽宮任便居住加食邑食實
封恩命不允不得再有陳請詔 二月十八日

朕以授鉞專征之任寵綏同姓可謂不敢輕矣既稟太
上之命又稽祖宗之制又協卿士大夫之議然後出節
少府讀命大庭如渙汗焉何可回也矧卿忱恂肅愆足
以承寧方鎮端莊信厚足以翼衛王家政倚宗彊毋勞
謙挹所辭宜不允不得再有陳請

賜端明殿學士朝奉大夫簽書樞密院事王淮

辭免國史日曆所脩進太上皇帝日曆經修
不經進特轉行一官依例加恩：命不允詔

朕述中興三十六載之政事備太上億萬斯年之觀覽
進讀之日慈顏悅豫臣庶呼舞惟時慶賞當與大臣共
之矧卿早被簡知雍容樞掾編摩時政與有力為其當
賞一也拾遺諫省言聽計從臆囊所陳備載于冊其當
賞二也粵朕初載實為少令總領諸彥纂脩成書其當
賞三也有是三者予惟汝嘉進階加邑初不為過又何
以遜避為哉所辭宜不允

賜朝奉郎試禮部尚書趙雄辭免經修太上皇

帝日曆特轉行一官恩命不允詔

惟我聖父聰明文思光澤天下而遜于位閔休偉績布

在簡牘視堯典若合符節 吉日辛亥陳儀展采尊奉

于大庭此固三代兩漢以來不可得而見者孰若吾身
親見之哉卿昔以敏識英詞秉筆於東觀今以洽聞殫
見摠議於南宮俾是書克成而禮容無爽者卿與諸儒
助朕之力也進官一列實侈榮懷其懋承之母勞固避

賜資政殿大學士中大夫知鎮江軍府事沈夏

乞除一在外宮觀差遣不允詔

朕夙宵念治常患二千石不皆得人使吾德澤不下流
民隱不上達方詔在位雜舉循良之吏而卿以帷幄近
臣與股肱名郡茲固朝廷所嘉賴四方所則倣者也曾

未半歲日需政成豈因斷瘍遂欲求去假樂之詩曰百
辟卿士媚於天子不解于位民之攸堅此言畿內諸侯
愛君勤職斯民所由休息也勉遵古誼倡率庶邦稱朕
意焉所請宜不允

繳奏沈復辭免慶壽加恩不合降詔 四月

今月十一日準御寶封付下資政殿大學士中大夫
知鎮江軍府事沈復辭免該遇太上皇帝慶壽赦書
加食邑奏劄一道奉御寶批降詔不允當院伏見近
降指揮因慶壽合該加恩官止降制給告免辭免後
來自使相執政已下並已遵行今來沈復竊恐合依

前項指揮更不降詔緣此未敢便行具草進入如合
聖意乞許本院一面資報尚書省劄下沈復照會伏
取進止 奉御筆批依

賜敷文閣直學士中奉大夫提舉江州太平興
國宮張津辭免知建寧府恩命不允詔

卿精明強濟練達恪勤更歷六卿夙高朝望周旋數郡
屢考民功載錫之符往臨閩服益用人莫如求舊擇守
莫如已試古之道也又何遜焉所請宜不允

賜昭慶軍節度使知荆南軍府事克荆湖北路
安撫使楊佖乞昇祠祿不允詔

昔我祖宗擢任邊帥近者十年久或倍之固未嘗踰歲而聽其去也卿選自籌惟鎮臨荆渚殫竭智慮予心載寧今軍容壯矣不可以棄爾成民俗安矣盍有以善其後奚為引疾願上印章詩不云乎夙夜匪懈度共爾位朕固不忘榦方之績也所請宜不允

賜敷文閣直學士中奉大夫陳彌作辭免提舉

江州太平興國宮恩命乞守本官職致仕不

允詔

朕惟卿廉介彊明久更任使乃身雖外念之不忘又惟卿爵齒浸高閔勞以事故推祠祿即拜于家優禮近臣庶幾兩得胡為避寵遂欲掛冠語知止則可矣在體國則未也尚欽予命時告遠猷所請宜不允

賜奉議郎試尚書吏部侍郎趙粹中乞除郡不

允詔

朕旁招衆賢穆布在位豈容法從輕去周行卿負卓絕之才而濟以文躬端莊之操而歸於厚久膺殊獎升冠貳卿方籍論思寧拘更迭昔畢公乃心王室而望之雅意本朝何卿之言獨異於是勿思為郡之樂益懋敬王之心所請宜不允

賜安慶軍承宣使提舉德壽宮張去為辭免特

轉一官聽回授不允詔

事親之樂與天無窮惠下之恩曷日而已故屬者方慶
慈極萬年之壽而今茲復稽宮庭五載之勞眷言審謹
之舊人首被褒優之異數理無可避往肅而承所辭宜
不允

賜觀文殿大學士銀青光祿大夫知福州陳俊

卿乞檢會前奏除一在外宮觀差遣不允詔

六月十八日

比覽忱言願從祠秩璽書往報桑蔭未移奚守一謙乃
勤再請惟帥藩之求代須封奏之有辭非公家之務困

於劇繁則私室之誠從而休迫迫今卿重臨樂土實總故
卿事簡政清不必牛羊之參問疆連壤接是惟鷄犬之
相聞加齒髮之未衰且士民之方信毋念浮丘之袂姑
榮翁子之衣所請宜不允

賜中大夫提舉江州太平興國宮姚憲辭免差

知太平州恩命乞且令依舊宮觀不允詔

月七日

牛渚而上有名郡焉俗媿而人淳奉優而事簡中興以
來間起執政舊臣為之守所以重蕃宣彰眷禮也卿頃
繇才望參秉事樞去位二年靡忘簡注適茲調守亟以

命之趣駕朱轡毋違朕命所辭宜不允

賜隨龍延福宮使保信軍承宣使提舉佑神觀

李綽辭免落階官除正任承宣使不允詔九

月七日

朕念潛藩舊人存者無幾故雖中涓之屬暫御之臣每示恩榮以昭予意而况久司宮省勤恪有聞退處祠庭安恬無咎如汝綽者予是固朕心所不能忘也正其使範假寵甚優往體眷懷毋為飾避所辭宜不允

賜趙伯圭上表再辭免除開府儀同三司充萬

壽觀使進封天水郡開國公加食邑食實封

恩命不允不得再有陳請詔十月十六日

漢以外戚車騎將軍節騰儀同三司官名之立實基於此元豐而後尊禮天屬多由節鉞進領斯任親：賢：蕃衛王室古今一也卿高明弗抗和易不流踐歷庶僚貴名日起躋登顯服華問益昭班視衮章象參台曜人以為允朕何敢私遜避之言固非矯激遂欲反汗不其難乎所辭不允不得再有陳請

賜武康軍節度使捧日天武四廂都指揮使右

金吾衛上將軍吳拱辭免除侍衛馬軍都指

揮使恩命不允詔十月二十七日

國家萃驍騎於羽林總以一帥雖副貳虞度之名不輕
畀付而况極其使領倚重可知卿鷲勇沉雄世號山西
之良將忠實詳練嘗典紹興之禁旅召從蜀道寘在環
列固欲用之也會茲謀帥首及舊人卿而不能尚誰可
者所辭不允

賜朝散大夫權吏部尚書韓元吉辭免除吏部

尚書恩命不允詔 十一月

孟軻有言所謂故國者非喬木之謂也有世臣之謂也
昔在仁祖得臣曰億純明忠諒厥有賢譽肆其三子交
秉事樞繫乃顯考德業尤著不隕世美庶幾在卿朕固

嘗試之掌制而嘉其文學之優進之典銓而知其識慮
之敏比還禁路彌簡予心總領從官亟加顯用世臣有
後多士所榮報國承家既知勉矣抗章避寵豈所望哉
所辭不允

賜中奉大夫蔡洸辭免除徽猷閣學士與郡恩

命不允詔 十二月二十三日

勅蔡洸省所奏辭免除徽猷閣學士恩命事具悉六閣
邃在西清學士班於內朝蓋朝夕論思之臣而非賦政
於外之官也雖然入為左右常伯出則下同庶常庶陞
之間等級奚辨放假侍從清華之職用為近臣出處之

光馭下以恩予心至矣卿才猷行義力世其家謙遜恪
勤不懈於位再司邦賦經費無虧請去之章奚為沓至
重違懇惻特昇隆名深體眷懷毋堅遜避所辭宜不允
淳熙四年

賜龍圖閣學士朝散大夫提舉江州太平興國

宮胡銓陳乞致仕不允詔 正月十六日

朕惟人臣有奮忠鯁而辭不撓涉患難而氣不衰豈獨
國家所當尊禮哉天必相之矣是故位雖高無盈滿之
慮年雖至有康彊之福士大夫方倚以為重而朕聽其
納祿可乎又况燕佚殊庭弗勞以事從容故里惟適之

安豈必退休以孤眷矚所請宜不允

賜觀文殿大學士金紫光祿大夫知福州充福

建路安撫使陳俊卿乞差在外宮觀一次不

允詔 二月

卿畫繡錦故鄉連四千石之重誰謂閩遠政聲則聞蓋民
安如曹參之治齊教明如召伯之分陝方寬予顧胡棄
爾成且知止足而樂燕閒衆人之情也宣上德而倡九
牧大臣之事也勉勤綏御毋咈注懷所請宜不允

賜中奉大夫提舉江州太平興國宮胡元質辭

免知荆南及復敷文閣直學士恩命不允詔

二月

勅元質省所奏劄子辭免除帥及復敷文閣直學士恩命事具悉朕愛惜近臣有如寶玉塵垢或止旋洗濯之卿政事文章為朕所器邦有大賚首還舊班謀帥荊州詔除甫下擁旄全蜀間寄滋隆式適其行毋替朕命所辭宜不允

賜新復敷文閣直學士中奉大夫胡元質辭免除四川安撫制置使兼知成都府恩命不允

詔

天文參井之度地志梁雍之域祖宗盛時方鎮莫重焉

今復合四路之權總于一帥凡兵民之利害官吏之否臧大者驛聞餘得裁制選掄加重抑又可知非有文翁之文武侯之武忠勤篤實為朕倚信者不輕畀也差撥近列謂卿為宜已趣造朝是將臨遣勉思叱馭毋或循墻所辭不允

賜通奉大夫參知政事龔茂良辭免進呈安奉

玉牒特轉兩官依例如恩命不允詔

朕惟昭陵盛德大業豐功偉績不可勝紀其所以覆幬萬物垂裕後世者尤在乎仁也茲撮機要著之寶牒而有司復以乾道近事同時奏篇如朕涼薄安敢望高皇

帝亦曰儀式刑文王之典日靖四方而已卿才經物表學貫道原久裁政機眾職交舉復以餘力纂成二書特昇醲恩用示褒勸朕於爵賞豈嘗妄加卿宜知之毋避可也所辭不允

賜通宜議大夫參知政事李彥穎辭免進呈安奉

徽宗皇帝實錄特轉兩官依例加恩：命不

允詔

朕惟昔者秦陵之政有因有革同歸於治而紀次之初是非失實紹興刊定乃為信書比命使臣載纂徽錄亦是意也不然二十六年仁民愛物之實制禮作樂之具

皆將疏略失傳而一時用事之臣虛美隱惡亦將無以考信於來裔矣卿才推國器學擅儒宗二柄迭司具宣嘉績茲率其屬趣成鉅編恭閱于庭歎嘉無斁雖大臣豈以階秩為輕重而國之信賞不可廢也亟祇定命毋執冲懷所辭宜不允

賜崇信軍節度使開府儀同三司提舉臨安府

洞霄宮史浩辭免除少保觀文殿大學士充

醴泉觀使侍讀進封永國公加食邑食實封

恩命不允詔

朕觀皇祐之盛時眷昌朝之舊弼祥原領使暫還袞鉞

之雄祕殿敷經特創班聯之峻極隆儒之異選垂異世
之通規非我老成熟參榮遇卿英姿邁往敏識鄰幾以
高明之學博初潛以康濟之謀毗大政若金汝礪諒納
燭之未忘毋玉爾音豈遐心之或有肆稽舊典增賁新
章越升亞保之班入奉列真之館肇封樂國增衍爰田
讀倚相之書朕方勤于稽古卒亘榮之業卿宜切於告
猷引避之言非予所望所辭宜不允

賜大中大夫提舉臨安府洞霄宮王炎再辭免
復資政殿大學士恩命不允不得再有陳請

詔

朕待遇臣鄰極其恩意而况久勞蜀道嘗冠樞庭茲固
夙夜不能忘體貌所宜先者也屬當謀帥允藉壯猷既
以疾辭義實難強是因郊賚特昇隆名眷囑有加於茲
見矣遜章疊上豈所望哉所辭宜不允不得再有陳請

賜皇子雄武保寧軍節度使開府儀同三司判

明州軍州事兼管内勸農使兼沿海制置使
魏王愷辭免除荆南集慶軍節度使行江陵
尹加食邑食實封餘如故恩命不允詔

朕觀成周盛時分封子弟布于侯甸其來朝也錫之路
車乘馬予之元衮及黼其有功也寵以加地進律賜以

鉄鉞圭瓚昏所以聚骨肉之恩強磐石之宗享國久長用此道也惟予賢子躬受偉材本之以忠孝文之以詩書出治勤水吏民安焉茲奉介圭少留漢邸親貴當有異恩商賚美名一新疊組仍加尹節增賁東藩僉論既諧慈衷以憚蓋古者七命賜國八命作牧九命作伯是惟不易之序又何以遜避為哉所辭宜不允

賜資政殿大學士太中大夫知建康軍府充江

南東路安撫使兼行宮留守劉珙辭免除觀

文殿學士恩命不允詔

勅劉珙省所奏劄子辭免除觀文殿學士恩命事具悉

屏翰行都昇為重鎮股肱宿望卿實閱才二年于茲道洽政治禮曰牧以地得民卿之謂矣又曰爵以馭其貴予可後乎學士之以殿名不過三等昔卿嘗歷其中外固已榮之今復進紫宸之班隆舊弼之禮庶幾五長各迪有功勸勉所關毋留朕命所辭宜不允

賜通奉大夫參知政事龔茂良乞除一在外宮

觀差遣不允詔 六月七日

朕兢業萬幾簡求四近知之深故任之久任之久故倚之隆若時具瞻豈可輕去卿精於問學裕於才猷一贊政機屢更歲律辨察衆職勤勞百為方藉同寅共圖熙

載胡然引疾遽爾祈間既非朕仰成之心亦非卿許國之誼勉安厥位毋咈予懷所請宜不允

賜通奉大夫龔茂良辭免除資政殿學士知鎮

江府恩命不允詔 六月十日

本朝優待輔臣甚非漢唐之比雖久煩以政間許均勞然恩典所加每從其厚既革之以峻職又付之以近藩出處之間厥有榮耀朕率是道以厲臣節卿淵謀敏識與學瓌才夙被簡知晉參機務累年於此厥績茂焉求退既堅重違雅志豈無異教以寵其行蓋臣之事君能合去就之義則上之遇下當全進退之禮往欽時命尚

考民庸所辭宜不允

賜通奉大夫龔茂良再辭免除資政殿學士知

鎮江府乞許奉祠不允詔 六月十一日

卿久翊政機具宣忠力抗章辭疾有慨予心加職典藩務隆國體何游形於封奏似未亮于眷懷且卿昔帥嶺南兵民戢其威惠旋臨江右旱滯資其撫綏曾是樂郊豈勞卧治九里蒙潤固未遠於行都四方于宣尚勉圖予嘉績所請宜不允

賜中大夫新除參知政事王淮辭免差權提舉國史院編修國朝會要所恩命不允詔 六月

二十二日

仲尼善志約魯史之舊章魏相有聲條漢家之故事惟
 今太史倣古宏摹眷予亮采之賢付以提綱之任卿經
 邦道廣緯國文高久踐機廷 著良平之畫參陪台路
 方追房杜之謀宜總諸儒遂榮兩命矧翱翔苑囿嘗
 筆削四朝之書而領袖蓬山亦既纂修一代之典茲延
 登於貳政乃因任於三長其趣奏篇毋勤遜牘所辭宜
 不允

賜觀文殿大學士金紫光祿大夫陳俊卿辭免
 除特進恩命乞依舊官職奉祠不允詔 七月

十九日

賜位之尊蓋循兩漢班朝之貴實次三公非嘗踐於台
 衡靡輕加於秩序卿純明無偽方重有常求福得不同
 之風事君明以道之義久儀揆路務清靜以寧民再位
 卿邦每中和而布政屢披封奏祈即燕閒既深諒於乃
 誠宜特隆於異數茲惟念舊亦以疇庸毋尚執於謙懷
 亟共承於朕命所辭宜不允

賜朝議大夫權尚書禮部侍郎兼同脩國史兼
 侍講兼權工部侍郎李燾辭免除禮部侍郎
 恩命不允詔 八月四日

貳卿再歲為真雖曰故事然量才錄德乃人主之柄豈專以日月為限哉卿性資簡廉問學淵博策名委質今四十年潛心史家景行先正凡列聖之功德一代之制度忠邪之議論夷狄之叛服表年提要總為巨編自建隆迄于靖康成書殆且千卷使朕覽觀乎家法興起乎治功有臣若斯其益多矣春官惟亞何以假為尚尊所聞毋或遜避所辭宜不允

賜龍圖閣學士朝散大夫胡銓辭免差提舉隆興府玉隆萬壽宮恩命仍乞休致不允詔

卿壯猷宏議簡在朕心未嘗忘也重以吏事煩吾耆老故稽歲月申命祠庭賦祿養賢厥惟古誼使子弟孝悌而忠信則國家安富而尊榮不素餐兮孰大於是趣其承命毋致為臣所請宜不允

玉堂類稿卷第七

終

玉堂類稿卷第八

周益文忠公集一百八

賜臣僚請免詔四

淳熙四年

賜觀文殿大學士金紫光祿大夫陳俊卿再辭
免除特進恩命只乞依舊官宮觀不允不得
再有陳請詔 九月六日

朕惠宗公以禮篤舊學以恩雖聽均休必昭異寵卿清
名諒節終始無渝入相出藩進退有裕因奉祠之請極
真祿之階恩禮所加他人莫望遇臣敬故朕心益庶幾
焉且長樂二年其勞多矣潛藩三益其功舊矣以茲受

爵卿豈無名所辭宜不允

賜徽猷閣直學士通奉大夫提舉江州太平興

國宮徐嘉辭免特轉一官致仕恩命不允詔

九月十四日

國朝定制自九品而上凡致軍事者必增秩寵之所以
獎廉退厚風俗也况卿登第於宣和侍從於紹興材猷
敏明朕所嘉獎年其耄矣納祿告歸不進文階何以馭
貴辭之為贅往即欽承所辭宜不允

賜定江軍節度使侍衛親軍步軍都指揮使興
州駐劄御前諸軍都統制吳挺乞除一宮觀

差遣不允詔 九月二十九日

昔卿伯父暨乃先臣繼提蜀師多歷年所厥有成績著
於西陲雖曰折衝之良亦惟久任之效卿選繇世將肇
敏前修方整暇之有聞豈燕閒之可議况年終強仕正
當一意於功名而日奉慈親何害兩全於忠孝勉酬朕
睦毋費爾辭所請宜不允

賜朝請大夫權尚書刑部侍郎兼侍講兼權給
事中程大昌辭免除刑部侍郎恩命不允詔

十月六日

朕勿諳于庶獄惟有司之牧夫其在秋官厥艱付畀卿

學術議論篤於古而切於今服采在廷秉誼堅確攝貳
憲部惟明克允參稽陟典升正其班昔舜疇咨九官臯
陶以申命而無避汝之作士其亦久矣往踐乃次尚奚
遜哉所辭宜不允

賜朝議大夫權尚書吏部侍郎司馬伋辭免除

吏部侍郎恩命不允詔 十月七日

自唐以來稱典選之能者必曰前有馬裴後有盧李及
考其涖職則遠餘十年近或六載美成在父朕甚嘉之
卿抱負才猷踐揚中外擢司銓綜歲聿再周敏明而將
以勤練達而濟之審不加真拜何以勸功詔綽身章並
從異數勉圖來譽將益汝知曾是進遷豈勞謙避所辭
宜不允

賜敷文閣直學士朝請大夫提舉隆興府玉隆

萬壽宮秦瑱辭免差知饒州恩命不允詔 十

月二十七日

卿傳業相門躋禁路既久安於家食乃自說於民庸
息畀郡章禮優從橐聞會稽之問誠有望焉辭伯石之
卿顧何取彼所辭宜不允

賜敷文閣直學士朝請郎范成大辭免除權禮

部尚書恩命不允詔 十一月二日

厥今往鎮莫重坤維嘉我寶臣介圭來觀疇庸錄德當
寘諸朝卿人物之英搢紳所重代言分閫左右具宜使
蜀再暮政尤可紀茲從嚴召入告嘉猷峻陟禮卿丕昭
眷獎有周吉甫文武憲邦其自鎬歸實多受祉爾幾於
是何以遜為

賜龍圖閣學士中大夫提舉江州太平興國宮

林安宅乞休致不允詔 十一月四日

古者任其事乃食其祿故士大夫年至則告歸所以佚
老也本朝優禮耆耄賦祿殊庭而不敢以事諉焉忠厚
之風過於前代遠矣卿處躬廉約蘊識通明爵齒俱高
朕所體貌奉祠居里足以自娛正使垂車又何加此勉
承恩遇姑抑素懷所請宜不允

賜端明殿學士朝散郎簽書樞密院事趙雄辭

免除同知樞密院事恩命不允詔 十一月四日

朕觀漢高帝知人善任使故凡當世豪傑皆樂從之游
至於運籌帷幄之中決勝千里之外則惟子房而已此
豈獨人力哉天授之也卿蘊有用之學濟非常之才應
劇易於折枝決疑明於大蔡本吾兵柄踰歲於茲多士
避其設施遠人咨其聲譽君臣契合視古庶幾惟延登
峻則望益隆惟屬任專則功易見厥惟高選豈曰序遷

成命已行毋勞控避所辭宜不允

賜觀文殿學士大中大夫知建康軍府事充江

南東路安撫使兼行宮留守劉珙乞差在外

宮觀不允詔 十一月十二日

昔君陳畢公咸懋厥德尹釐東郊惟成暨康既已膺保
多福而彼二臣亦俱享永世無窮之聞著在簡冊朕心
嚮焉今之秣陵周之洛邑也以卿閎才碩德嘗踐股肱
之任故命居守庶幾前人簡脩進良別慝瘴惡三載如
一顧憂以寬論年齒則未高語節宣則無爽寧容均佚
咈我注懷益圖爾休冀京師并蒙福也所請宜不允

賜通議大夫參知政事李彥穎乞解罷機政不

允詔 十一月十六日

卿進繇德望參秉事樞機：於納忠而未嘗近名致：
於奉職而見謂知體中外寧謐陰陽燮調民重爾瞻予
資汝翼定契如金石久方益堅相湏如股肱理不可易
豈以晦明之或爽乃於去就而輕言矧已造朝初無它
恙深念倚毗之意迄攄康濟之謀所請宜不允

賜通議大夫參知政事李彥穎上表再乞解罷

機政不允不得再有陳請詔 十一月十七日

朕每念為君之難自朝至于日中曷不遑暇食既躬攬

丕務又博詢衆言幸今方內小康民俗嘉靖豈敢自以
為功哉亦惟二三執政畢精竭慮協恭亮采之助也卿
以忠醇篤實總領衆職期予于治朕有望焉奈何朕肱
之力方陳而羸悴之語遽聞腹心之倚方切而退休之
請狎至率作興事獨不念臯陶之颺言乎章雖頻煩朕
弗聽也所請宜不允不得再有陳請

賜新除端明殿學士知江陵府姚憲乞除一在

外宮觀不允

詔

十二月二日。元
係中大夫知泉州

朕以卿泉南之政明而不苛治辦而不擾是用復麟趾
名官之舊付鷄尾一道之寄所以待卿者寵矣便道之

鎮方茲趣行立園之言何自而至亟開幕府稱朕意焉
所請宜不允

又詔

十二月七日

勅姚憲省所奏劄子辭免除端明殿學士知江陵府恩
命乞檢會前奏除一在外宮觀差遣事具悉建牙閫外
以嚴節制之權著籍殿中以重朝廷之體若時舊弼斯
稱茂恩卿恢廓精明恪勤敏濟州符使節嘗宣力於神
臯樞院政機旋惠疇於兩社積其望實溥我龍光自起
殿於藩方每遊聞於課最申頌異數用獎多庸十國為
連兼付兵民之重群州承措共觀條教之新式駿爾行

難遷予令所辭宜不允

賜徽猷閣學士中奉大夫知寧國軍府事蔡洸

乞除一宮觀差遣不允詔 十二月十二日

維乃重祖事予仁皇總邦財則以瞻足聞涖民事則以威惠著朕固嘗嘉歎其賢而易名於百年之後矣先烈之不墜繫卿是圖主計典州眷焉克紹日需報政惠此潛藩豈以微疴遽容自佚式適藥喜稱朕寵遇世臣之心所請宜不允

賜觀文殿學士大中大夫知建康軍府充江南東路安撫使兼行宮留守劉珙乞檢會前後

奏章差在外宮觀一次不允詔 十二月十四日

卿以爽邦俊德倡率九牧智慮所及何事不濟恩威所加其誰不服乃者旌崇治效循用漢制益嘗璽書勉勵增秩而賜金矣重開幕府未踰歲也而囊封疊上累數百言畏避寵榮殆三致志是豈慷慨事功匪躬一節之誼哉勉為朕留迄成美化毋使因任之詔徒為虛文也所請宜不允

賜敷文閣直學士朝請大夫秦塤辭免改除知

舒州恩命不允詔 十二月二十七日

卿名參侍從踰二十年起分左符詔許未觀因其自列

易地以居朕於故家可謂恩矣且番雖支郡其民重其事繁於為政也難舒雖節藩其民淳其事簡於為政也易相攸之易夫豈徒然節用愛人敬事而信以此道千乘之國私心安而公論慝矣何以遜避為哉所辭宜不允

淳熙五年

賜朝議大夫試尚書吏部侍郎司馬伋乞一在

外宮觀差遣不允詔 正月十日

卿性資夷雅識慮精明方倚通才有華近侍間嘗移疾日俟造朝奚為自列於公車遂欲即安於祠館雖東野

之失二子難忘幹蠱之私然商瞿之有五男足奉舍館之樂勉安厥次難徇爾誠所請宜不允

賜中大夫新除知江陵軍府事姚憲再辭免除

端明殿學士恩命不允詔 正月十一日

朕懷政路之舊勞則茂隆於寵數責帥藩之新組則增煥於榮名篤一誼以申恩俾群臣之知勸卿既肅詔函而趣駕豈容持謙柄以飛章矧名諱之不偏實古今之共守恪遵前詔勉輯來庸所辭宜不允

賜奉國軍節度使殿前副都指揮使王友直乞

除一宮觀差遣不允詔 正月十九日

唐書卷八
王堂類稿卷八
卿忠而善謀勇而好禮上為國家所倚信下為士卒所
畏服有將如此人其捨諸且環列之尹至榮也萬鍾之
祿至厚也以是將毋固可得其懽心而何恙之不已耶
所請宜不允

賜武泰軍節度使開府儀同三司克萬壽觀使

曾觀乞致仕不允詔

正月二十二日

古者大夫有服采之勞故七十則致君事由卿而上已
不著引年之禮况夫視儀台路未嘗任職遂欲得謝不
其難乎卿氣槩沉雄智謀閱遠詩書之府仰止古人忠
義之閑根于天性八年宿衛一意董齊升正中權重符

衆望久虛之典其懋承之所辭宜不允

賜少保觀文殿大學士克醴泉觀使侍讀永國

公史浩乞休官不允詔 二月六日

惟我祖宗禮遇故老內祠經席便於諮詢而一時宗工
宿儒亦罔不心在王室至有請觀而願留者上下之間
交致誠敬朕甚慕焉乃者起卿於故鄉待卿以優禮蓋
率是道庶還舊章卿既以昔賢之心為心為朕肯來矣
尚循黃髮則罔所愆閱歲方新豈容遽去善養老者朕
方追西伯之風以為已歸卿當法太公之義所請宜不
允

賜奉國軍節度使殿前副都指揮使王友直辭
免除殿前都指揮使恩命不允詔 二月四日

賜武泰軍節度使開封儀同三司克萬壽觀使
曾覲再上表乞致仕不允不得再有陳請詔

正月二十五日

朕惟士大夫年至而必去者大槩有二筋力憊於馳驅
精神憚於酬酢一也故鄉可歸思晝錦之樂家庭在遠
想蘭菊之生二也今卿茂耆明之識兼將相之官燕息
內祠身固逸矣賜第北闕去將何之而需章繼來辭按
情確罕由斯道固無今日之譏僭賦帝京何待引年之
後勉回克守庸體眷懷所請宜不允不得再有陳請表

引唐罕由斯道
僭賦帝京事

賜散朝大夫試尚書戶部侍郎韓彥古辭免除
權戶部尚書不允詔 二月六日

唐文公集 五堂類稿卷八
昔周命畢^君牙為大司徒而告之曰洪敷五典式和民則
心膂之任不其至于卿父服勞忠義厥有成績紀於太
常卿又能博習古今長於政事肆予命爾以地官之職
逮茲踰歲邦用寢饒進守右民協于陟典非以爵秩
遲速論也且卿既自期遠者大者矣固當思艱圖易
俾民則寧昭乃辟之有乂豈應以遜避為諒哉所辭
宜不允

賜少保觀文殿大學士克禮泉觀使侍讀永國
公史浩上表再乞致仕不允不得再有陳請

詔

卿往歲連貢封章懇還印組勇退既孚於衆論眷留獨
切于予懷學于甘盤方且念高宗之舊居乎魏闕正宜
推公子之心何存控于忱誠似頓忘於雅素富與貴得
以道况非不處之時明且哲保其身更思匪懈之誼毋
貪廉士之小諒而廢老臣之大方所請宜不允不得再
有陳請

賜朝議大夫試吏部尚書韓元吉乞授一州郡

不允詔 二月十九日

卿辭章麗則議論通明其在故家號為翹楚朕所獎擢
異乎諸臣方藉廉平澄清銓選抑資獻納倡率從官何

嫌何疑遽欲治郡姑安爾職毋復有云所請宜不允

賜敷文閣直學士中大夫知紹興軍府事充兩

浙東路安撫使張津乞改差一在外宮觀差

遣不允詔 三月一日

久於任人則有成功熟於治郡則無過舉此古今不易之理也卿材猷肅給政術精明典選守藩備宣乃力彌年於越績效寢彰上書求間殊拂予意且年豐用足弊革訟稀於茲居簡而臨民足以清心而省事奉祠之樂又何加焉所請宜不允

賜通議大夫參知政事李彥穎乞解罷機政除

一在外宮觀不允詔 三月十三日

執政之臣朕所注意而民所具瞻也進退之際豈容或輕卿篤實安和通明敏茂周旋二府累年于茲庶事浸康百工允治方隆眷倚其可去朝且卿昔以疾言尚有可諉今心志益壯筋益強復圖便安斯亦何義勉安厥位毋拂予懷所請宜不允

賜通議大夫李彥穎辭免除資政殿學士知紹

興府恩命不允詔 三月十四日

卿質直好義恭儉惟德本之以學識華之以文藝立朝十載貴名起焉與政四暮庶績凝焉乃自冬徂春求去

彌確朕既不能奪卿之志矣鉅藩峻職又何愛焉夫朝
釋柄於廟堂夕擁旄於帥閫出處榮矣班不離乎內殿
地未遠乎王室待遇至矣尚體茲意毋形遜章所辭宜
不允

賜李彥穎再辭免除資政殿學士知紹興府恩
命不允不得再有陳請詔 三月十七日

殿以政名非舊弼鮮能至者帥由廷授惟通才乃克當
之茲均參輔之勞誕錫兼榮之命卿體業端亮風規粹
清逢辰有為秉誼弗懈進裁不務方倚於壯猷退保令
名遽辭於高位聯宸宇之祕職剖藩侯之左符體貌大
臣在予良厚股肱近郡於爾不遐已疊下於詔函毋固
持於謙柄所辭不允不得再有陳請

賜少保觀文殿大學士克醴泉觀使侍讀永國
公史浩辭免特授右丞相進封魏國公加食
邑食實封恩命不允詔 三月十九日

昔在仁祖有名相曰士遜始也師友潛藩致直諫之益
中也輔贊初政立太平之基寶元康定之間年彌高矣
爰以舊德仍踐相位功名福祿悠久光明著在信書朕
用嘉止今卿有復貫蹈中之學有致君澤民之心定契
於談經之初奮庸於受禪之始久安於外比趣其歸鼎

席方虛肆加圖任卿其推往歲未攄之蘊勵老臣益壯
之猷使朕收論相之功而卿極經邦之效庶追前烈輯
寧我家遜避之言蓋可略也所辭宜不允

賜少保右丞相史浩辭免提舉編修玉牒提舉

國史院提舉編修國朝會要所提舉勅令所

恩命不允詔

四月十七日

漢興相國何首定律令厥後置太史公凡天下計書先
上焉其副乃上相府當時謂序事如春秋然則約史定
令並付台宰非特本朝故事亦漢制也况卿學成而識
愈高年耆而智益明往在初元已司大典今加四組其

又奚辭且孝宣中興魏相有聲者正以總領衆職甚稱
上意也今吾丞相何憊焉所辭宜不允

賜中大夫叅知政事趙雄辭免同提舉勅令所

恩命不允詔

自天聖中呂夷簡以貳政之臣同定編勅厥後二府遂
為故實蓋進而參道揆於一堂之上退而明法守於三
尺之中皆大臣事也卿學足以洞古今識足以周利害
制而用之謂之法神而明之存乎人損益之間足行所
學傳不云三王為法令也合於人情顧豈與詩書異指
哉所辭宜不允

賜中大夫叅知政事范成大辭免權監修國史
日曆所恩命不允詔

恭惟真宗眷禮王旦粵以參豫假之史權舊章具存朕
用時憲卿負造微經遠之識兼廣記備言之長頃游著
廷風搆華問今踐政路往提大綱惟中興諸臣逸事之
未補而時政鉅典屢書者無窮勉飭纂修毋庸控避所
辭不允

賜少保右丞相史浩再辭免提舉編修玉牒提
舉國史院恩命不允不得再有陳請詔
四月
十八日

史局名雖不同其是非筆削一也昔者左右置相固當
分領茲予圖任舊德獨專宰柄其兼舊職抑有故常况卿
在太上時益已纂修寶牒既初相朕又嘗提綱正史然
則今日之命非輕舊物乎逡巡固遜何也所辭宜不允
不得再有陳請

賜昭慶軍節度使知太平州楊俊乞除一在外
宮觀差遣不允詔
五月四日

當塗古號名邦在今日猶股肱郡也填臨於此非獨資
共理而已益亦示優異之恩焉卿夙負才猷嘗參機宥
勅裁劇務莫或告勞典治便藩固多餘裕胡為抗疏願

奉外祠既大嘑士民惜留之心且將蹈守將數易之弊
勉綏乃服寧有後艱所請宜不允

賜特進觀文殿大學士提舉臨安府洞霄宮陳
俊卿辭免判隆興府恩命不允詔 五月八日

眷者哲則國體尊篤故舊則民風厚重帥守則威望著
用循良則主德宣合是四者內斷于朕心外協于公論
然後付卿以江右一道之寄其選可謂艱矣寧容引疾
遂已乎且出令如汗不可反也謀帥匪石不可轉也亟
承印綬毋使彼民興來慕之謠

賜奉國軍節度使殿前都指揮使王友直乞除

一宮觀差遣不允詔 五月八日

卿夙以公勤入衛王室雖周廬千列實賴訓齊然未有
出征遣戍之勞也大昕造朝山立俄頃過此以往無非
奉甘旨侍藥石之時何待奉祠始云將母第兼忠孝必
獲助于幽明詔旨屢頒豈不予聽所請宜不允

賜奉國軍節度使殿前都指揮使王友直再乞
檢會前後奏除一宮觀差遣不允不得再有

陳請詔 五月十日

古者王事靡盬至於不遑將母今卿拱護殿巖初未嘗
廢溫清之樂也惟忠與孝足可兼全求退之章奚為游

至雖陳詞懇切固孝於其親矣然國爾忘家方倚卿以
辦治軍事安可不念忠君之義乎所請宜不允不得再
有陳請

賜龍圖閣學士提舉江州太平興國宮林安宅

再乞致仕不允詔 五月十八日

朕聞明王貴、而老、貴、故優以爵祿老、故弗煩
以事是謂古今之通誼國家之盛禮所以待執政侍從
之舊而非百司庶常所敢望也卿嘗叅四近當識朕心
奈何六載之間四來告老且禮經雖著引年之制豈不
繼以若不得謝之文乎恩意所加卿亦可以安矣所請

宜不允

賜朝請大夫試尚書刑部侍郎兼侍講程大昌

乞特除一小郎或在外宮觀差遣不允詔 五

月二十五日

王制有言刑者例也例者成也一成而不可變故君子
盡心焉卿貳憲部再踰歲矣郵罰麗事惟既厥心而况
經術足以決疑文采足以華國方深眷簡求去何為所
請宜不允

賜武康軍節度使侍衛馬軍都指揮使吳拱乞

除一在外宮觀差遣不允詔 五月三十日

卿勇號冠軍任隆典午粵從遣戍頻歲於茲士飽馬騰
備聞整暇寬吾北顧藉爾長城均佚之言奚為而至善
加願養母咈注懷所請宜不允

賜朝請大夫試尚書刑部侍郎兼侍講程大昌

辭免吏部侍郎恩命不允詔 六月二日

小宰之職法令備具惟明則吏莫能惑惟公則中有所
守必兼二者乃允斯任卿清通精審善於燭理洪毅堅
正難於奪志操此驗彼當官而行右銓雖繁吾得人矣
進遷惟寵尚無避哉所辭宜不允

賜中大夫叅知政事范成大乞解罷機政不允

詔 六月九日

入贊萬微寔聯四近進退之際豈容或輕卿辭章雋明
術業閎茂朔南梁益弗已於行賜環來歸登用屬耳胡
為引疾遽欲退休姑體眷懷勉綏厥位所請宜不允

賜定江軍節度使侍衛親軍步軍都指揮使興

州駐劄御前諸軍都統制吳挺辭免兼知興

州恩命乞檢會累奏除一宮觀差遣不允詔

六月十四日

帥守一事也兵民一道也故賞罰足以服三軍之衆則
威惠必能得千里之心况爾先人嘗兼斯任棠陰未遠

世閱方隆往以元戎復提郡印惟西平有子惟我有臣
勉荷寵光毋思間適所辭宜不允

賜朝奉大夫試給事中兼侍講錢良臣辭免除
端明殿學士簽書樞密院事恩命不允詔 六

月二十三日

功名之會必與當世英傑共圖之卿以文武全材兼孝
恭令德朕初識擢即有大用之意然猶試之總賦以觀
其知略倚之專對以察其忠信演綸批勅又灼知其詞
章議論之美一旦寘諸宥密之地協贊規模之遠師言
罔不穆士心罔不附知人則哲朕方日以為喜而卿過
為遜避何哉所辭宜不允

玉堂類稿卷第八

玉堂類稿卷第九

周益文忠公集一百九

賜臣僚請免詔五

淳熙五年

賜中大夫叅知政事趙雄辭免權監脩國史日

曆恩命不允詔 六月二十四日

編摩鉅典雖屬諸儒總領宏綱實資 弼益進則奉延
 英之對退而裁東觀之書事既親聞理斯傳信卿詞鋒
 峻拔學殖高明元之本之群昔常參於大雅赫之巖
 巖之節今方峻於具瞻往司載筆之權益顯用儒之效
 毋煩固避其即欽承所辭宜不允

賜定江軍節度使侍衛親軍步軍都指揮使興
州駐劄御前諸軍都統制吳挺辭免除利州
西路安撫使兼知興州恩命不允詔 閏六月

十日

昔在紹興即蜀北境分置二帥東治漢中西治葭萌皆
擇良將並付兵民之任折衝固圉蓋良法也今朕復還
舊制不輯事功適卿來朝故有因任之寵且皆卿父故
官也威聲在軍遺愛在人以卿之才諒思濟美親嫌細
故勿復以云所辭宜不允

賜朝請大夫試尚書吏部侍郎兼侍講程大昌

辭免兼同脩國史恩命不允詔

閏六月十一日

筆削之任難矣而况鋪張四朝大典於簡編闕軼之後
歲月侵尋之久其為難也抑又甚焉非時名儒孰訖功
緒卿才足以擅述作學足以貫今古識足以辨是非具
此三長實曰良史往率同職致：不怠趣以成書來上
毋為退之：遜避可也

賜朝散郎試右諫議大夫蕭燧辭免除刑部侍

郎恩命不允詔

閏六月十四日

司寇職掌邦刑二卿班高法從朕重此選每難其人卿
以問學甲進科以靖共儀清貫久居諫省備彈諷議之

勞擢佐秋官方藉論思之益遽披封奏漸避寵榮顧成命之已孚豈謙懷之可徇所辭宜不允

賜觀文殿學士大中大夫知建康府充江南東路安撫使兼行宮留守劉珙乞檢會前奏除一在外宮觀不允詔

閏六月十九日

朕深懲守帥之數更不遴擇循良而又任眷陪都之重地煩宥府之舊人逮此累年底於多績召公南國當自適于憩棠裴度北門顧奚妨於卧鎮寧容引疾遂欲合符勉思自養之方庸體仰成之意所請宜不允

賜隨龍永州防禦使添差權發遣兩浙西路馬

步軍副總管臨安府駐劄李厚辭免特轉行

一官再任恩命不允詔

閏六月十九日

附翼攀鱗古今攸重刈著取屢賢哲所嘉眷乃舊臣從予資善每念閱時之久寧忘奉事之勞而况謹飭無違踐揚有譽爰峻加於使範併因任於戎昭祇服恩章毋馳遜牘所辭宜不允

賜皇子荆南集慶軍節度使開府儀同三司行

江陵尹判明州軍州事兼沿海制置使魏王

愷辭免除永興成德軍節度使雍州牧加食

邑食實封恩命不允詔

閏六月二十五日

唐虞分任州牧與揆岳等故咨二十二人欽亮天功而
收在焉茲朕稽古俾予賢子建牧於秦而又易以雙節
衍以多戶庶幾上下相維內外咸治無愧乎帝者之時
一已制書既誕告矣理難固避往肅而承所辭宜不允

賜皇子荆南集慶軍節度使開府儀同三司行
江陵尹判明州軍州事兼沿海制置使魏王
愷上表再辭免除永興成德軍節度使雍州
牧加食邑食實封恩命不允不得再有陳請

詔 閏六月二十七日

漢世循良賜爵八年之後舜朝岳牧陟明九歲之間惟

我賢王蔚為良翰以其政則何慚於愈治以其時則適
契於咸熙用考彝儀優加異數雖示親之之意實昭貴
貴之公典冊方頒封章毋再所辭宜不允不得再有陳
請

賜皇子荆南集慶軍節度使開府儀同三司行
江陵尹判明州軍州事兼沿海制置使魏王
愷再上表辭免除永興成德軍節度使雍州
牧加食邑食實封恩命不允不得更有陳請

詔 閏六月二十九日

周官以九兩繫邦國之民牧為之首其任可謂重矣今

將舉父虛之典旌異等之效非吾賢王孰克當此汝以大雅不群之資濟克勤小物之美孜：民政夙夜不怠休聲善狀日徹聽聞朕甚嘉之夫論功行賞雖踈遠之臣不敢遺也况親而近者遜章疊來於禮為過所辭宜不允不得更有陳請

賜龍圖閣學士朝散大夫提舉龍興府王隆萬

壽宮胡銓辭免除端明殿學士依舊宮觀恩

命仍乞檢會前奏許休致不允詔 七月二日

因殿名官起於麟趾初以待文學之士而已爰暨本朝思禮隆重非執政大臣若侍從者德未有徑躋而躡至

者以卿早居朝列言衆人之所不敢言久從炎荒處衆人之所不能處無窮之報乃在于今故天畀卿以壽考康寧而朕賜卿以高爵厚祿尚堅壯志迄獲我心告老常儀毋容教至所辭宜不允

賜皇太子永興成德軍節度使開府儀同三司

雍州牧判明州軍州事兼沿海制置使魏王

愷辭免擇日脩禮宜允詔 七月二日

古者之待牧伯也名位不同禮數亦異是以冊拜有九儀之命來朝有三夏之享今朕欲舉行盛典而爾乃執謙固辭雖咈慈懷姑成美志所請宜允

賜少保右丞相史浩乞歸田廬不允詔七月三日

人主職在論相王臣義存匪躬朕既圖任舊人而有為
卿宜永弼乃后而無怠中外望治旰宵仰成顧閱時之
尚新胡引疾而求去自計固得民瞻謂何其益勵於壯
猷以丕凝於美化所請宜不允

賜昭慶軍節度使知太平州軍州事楊俊乞除

一在外宮觀差遣不允詔七月五日

卿前上書丐還郡綬朕固嘗諭卿久任之旨矣今總數
月囊封隨至何其遽耶且年豐事簡民氣和樂古人所
謂卧治而坐嘯者正可跂其高風毋切以奉祠為言

也所請宜不允

賜少保右丞相史浩上表再乞解罷機政不允

不得再有陳請詔七月初五日

朕觀西漢二百餘年間丞相再至者惟周勃孔光二人
而已今朕臨政願治十有七載而登庸舊相實自卿始
則夫疇咨之審倚注之厚期望之切不待言而信矣無
故上印朕何賴焉且三年虛位而求之數月閉閣而去
之同心同德當如是乎其悉予懷勉安厥位所請宜不
允不得再有陳請

賜寧武軍承宣使知閣門事兼客省四方館事

張掄乞除一在外宮觀差遣不允詔七月十

二日

卿胄緒高華辭章精敏恪奉清閒之燕肅提臚句之傳
閱歲滋深結知方厚詎因似續之故驟上退閒之章擁
膝而歌當念陶朱之達頓頭以喻更思韓愈之言况聞
有子之克家毋廢乃心之存闕所請宜不允

賜宣奉大夫提舉臨安府洞霄宮魏杞辭免復

端明殿學士恩命不允詔 七月三十日

朕待遇臣工懋昭恩意有懷舊相何吝寵章卿制行安
和受材博敏自釋台衡之寄久從祠館之游既嘗簡於

異知宜浸還於祕職雖身居外服許遠燕閒而名繫內
朝實隆體貌毋煩懇避往即欽承所辭宜不允

賜奉國軍節度使殿前都指揮使王友直乞除

一宮觀差遣不允詔 八月八日

卿以智略公忠為朕倚信久典禁衛士心服焉惟勤勞
弗懈之故節宣或爽遣醫予告昭示眷懷軍政既脩何
憂廢事卿其省思慮親藥石以速有瘳之喜稱朕意焉
所請宜不允

賜特進觀文殿大學士新判隆興軍府事兼管

內勸農營田使充江南西路安撫使馬步軍

都總管陳俊卿辭免差知建康府恩命不允

詔 八月十日

大江東西並置連帥其屬任等耳若乃外控淮甸內屏浙右建牙作牧兼寄留都之管蓋則於選擇抑又重焉卿蚤傳初潛簡知惟厚久儀宰路望實具乎前以從臣攝行帥事凡兵民之利病江山之形勝固嘗深思而熟講矣嗣成前績人胥謂宜矧卿不憚暑行既開洪府今秋高氣爽舟輿安適造朝之鎮乃復告勞予式適其驅毋過朕命所辭宜不允

賜中奉大夫試吏部尚書韓元吉乞畀一州郡

不允詔 八月十一日

治官在六卿中號為劇曹欲觀厥成必久其任卿心潛問學世濟材猷自陟從班即周旋銓綜之地庶幾精通法意檢柅吏姦吾士大夫按格而至者功罪得其平能否當其分則其為報効也豈不賢於宣力一州乎所請宜不允

賜中奉大夫韓元吉辭免除龍圖閣學士恩命

不允詔 八月十四日

恭惟太宗以武定并汾以文致恭平聖謨寶訓實與河圖洛書相為表裏祕藏廣內冠於西清自非名臣豈容

假寵卿詞章近古學術造微領袖從官閱時寢久懇祈
治郡莫得而留隸職其間人以為允尚欽異數佇考民
功所辭宜不允

賜宣奉大夫提舉臨安府洞霄宮魏杞再辭免

復端明殿學士恩命不允不得再有陳請詔

八月十五日

通班祕殿允藉告猷賦祿公朝固將稱事若乃待遇無
分於中外褒優不廢於燕閒此本朝之至恩實前代之
闕典卿溫恭夷雅久踐周行敏達純明常居揆席雖歸
從於家食仍簡在於予衷錫以寵光續其廩稍既示均
休之意抑招馭貴之公往即欽承毋煩多避所辭宜不
允不得再有陳請

賜敷文閣直學士中大夫陳彌作上表乞守本

官職致仕不允詔 八月十七日

朕以卿風力强敏老而未衰方即家居寵卿以二千石
之印綬是豈掛冠神武時乎泉南大邦為朕並往且卿
閭在望素知其習俗便道之鎮靡勞于行役使卿擇地
何以加之勉勤布宣圖所以稱此者所請宜不允

賜昭慶軍節度使知太平州軍州事楊傑辭免

知隆興府恩命乞檢會前奏除一在外宮觀

差遣不允詔 八月二十四日

朕顧瞻吳楚之間襟帶江湖之會古為督府今號潛藩
每咨擇於重臣往增隆于制閫卿器資沉裕材韞䟽通
蚤更踐於劇繁嘗參聯於宥審適茲謀帥無以易卿與
其從容千里之中未殫遠略孰若鎮撫十連之重益著
多庸亟思承命之恭難徇均休之志所辭宜不允

賜中大夫試刑部尚書張津乞除一在外宮觀

或近地小郡差遣不允詔 八月二十七日

卿夙蘊材猷早更事任浙水股肱之郡久賴蕃宣文昌
喉舌之司肆如選擢自帥五刑之屬僅踰半歲之間曳

履方榮乞麾何遽其效論思之益以承眷獎之恩所請
宜不允

賜昭慶軍節度使知太平州軍州事楊傑上表

再辭免知隆興府恩命不允不得再有陳請

詔 九月一日

朕於謀帥可謂難矣既欲其資望之高使列城奉令而
承教又欲其政事之敏為斯民興利而除害兼是二者
在卿為宜故自偏州改臨鉅鎮節旄增重榮戟有光往
布藩條寬吾西顧遠巡固避豈所望哉所辭宜不允不
得再有陳請

賜敷文閣直學士中大夫陳彌作辭免差遣知

泉州恩命不允詔 九月二日

泉南地大民衆為七閩一都會加以蠻夷慕義航海日
至富商大賈寶貨聚為獄市之繁非他邦比也朕思得
政事彊明庶平不擾者付之符竹閱從臣之籍無以易
卿已趣開藩勿勞謙避所辭宜不允

賜資政殿大學士中大夫知福州軍州事克福
建路安撫使沈復乞除一在外宮觀差遣不

允詔 九月二十一日

卿儒猷吏方克自懋勉服休服采中外且宜向繇南徐

往鎮閩部裕乃民如康叔克勤小物如畢公日需政成
不勸列郡遽思避寵殊異所聞詩不云予樂只君子殿
天子之邦樂只君子萬福攸同顧豈以滿盈為慮哉所
辭宜不允

賜中大夫新任在外宮觀張津辭免除敷文閣
學士恩命不允詔 九月三十日

乃文徽祖有倬宸章飛閣緣雲襲藏惟謹於茲列職允
謂高華以卿久踐班聯屢更藩服比從璽召入長憲曹
今聽均休豈無異數肆因舊直益進其班往服恩光毋
為遜避所辭宜不允

賜少保右丞相史浩叅知政事趙雄辭免幸祕
書省推恩特轉一官恩命特依所請詔 十月

十二日

先民有言天子所至曰幸謂非臣下可得而冀也日朕
親臨東觀歷覽圖史遠繩祖武 近踵紹興之盛凡
在三館咸進秩一等用侈榮遇矧卿以鴻儒碩輔兼太
史公之任顧可獨已乎成命方頒遜章遽上永惟將順
有素固不當以疑似為嫌雖然周官八柄予以馭幸云
者蓋太宰詔王馭群臣而非以馭大臣也其趣銷印庸
示尊禮且著夫謙德之美為宜特依所請

賜中大夫叅知政事趙雄再辭免玉牒所進書
充禮儀使特轉一官依例加恩：命不允不
得再有陳請詔 十月十六日

卿以造微之學任重之器服在廊廟謀猷日嘉朕所以
期卿者遠矣豈以一官為輕重哉然國有盛典卿實相
之恩禮所加不容廢也且熙寧而上凡登政路階必四
品今茲進選朕方以為晚卿猶固避何哉所辭宜不允
不得再有陳請

賜少保右丞相史浩辭免玉牒所進書轉兩官
特許回授依例加恩：命不允詔 十月十六日

派皇室之璿源書首成於章聖上仁朝之玉牒禮嘗講
於熙寧兼二典以奏篇審一時之能事卿儒猷碩大德
量淵宏儼袞綉以端朝摠播紳之載筆進官懋賞厥有
前彛錫命貶恩已從雅志尚茲固避毋乃過謙所辭宜
不允

賜少保右丞相史浩上表再乞解罷機政不允

詔 十一月十三日

朕比煩舊德再幹洪鈞以公歸兮方喜繡裳之見於良
足矣遽念赤松之遊今庶職交修四方無警廟堂之上
固可雍容事物之來不難酬酢當效大雅老成之助毋

專道家止足之思所請宜不允

賜端明殿學士朝奉大夫簽書樞密院事錢良

臣辭免除叅知政事恩命不允詔 十一月十

七日

朕以西樞本兵權以東府議國政其在二柄固有所分
至於聚精會神修明治道而圖 國家長久之術則二
三執政倚注一也卿學問器識議論風采絕出漢廷之
右君臣契合所謂不膠漆而固者茲從宥密進于疑丞
非以卿文武憲邦左右具宜故耶成命已行何避之有
所辭宜不允

賜新除少傅史浩令所司擇日備禮冊命辭免
宜允詔 十一月二十一日

洪化二公位崇禮重大廷延拜古有彝章卿以舊學之
良懇還相印進班左棘昭示隆恩方詔攸司消辰作冊
遽披封奏祈寢縟儀謙德有光歎嘉無斁所請宜允

賜右丞相趙鼎辭免提舉國史院提舉國朝會

要所恩命不允詔 十一月二十三日

本朝以宰相分領三館定其位序今朕揚祖烈類故實
而命相臣兼掌斯事亦是意也卿學足以經世文足以
華國自初識擢固嘗秉東觀之筆修四朝之史矣今以

丞相之重總提大綱使諸彥有所奉承二書不至闕軼
是亦儒效之一端也何以遜為所請宜不允

賜朝奉大夫叅知政事錢良臣辭免監修國史

日曆恩命不允詔 十一月二十二日

起居有注時政有記萃於東觀加纂修為國家之大典
也卿學識高明文辭瞻麗疇厥望實服在左右凡朕出
入言動固已目擊耳聞而政事弛張人材進退又皆參
豫而奉行之矣總率諸儒以事繫日使是非不失其正
而可以傳信於萬世固其職也又奚遜焉所辭宜不允

附奏

臣今月二十二日准御封下叅知政事錢良臣辭免
監修國史日曆所劄子一道除已草不允詔進入外
其間偶有所疑理合奏稟臣竊謂國史日曆者書名
也曰所者官司也若提舉則可言其所而謂監修則
止當作監修國史日曆今內尚書省批旨却作監修
國史日曆所似多寫所字若就出勅改正頗為允當
又乾道元年春命叅知政事錢端禮虞永文分領書
局時並按景德間叅知政事王旦權領史館故事各
帶權字自後十餘年間執政皆用此制所降指揮却
無權字是以錢良臣奏劄云疑丞兼領止加承攝之

名忽冒直除葢聞近比若是特出聖意固無不可或
一時偶然差誤臣以職守所及亦合奏知併乞睿照

賜昭慶軍承宣使提舉佑神觀士欽辭免除保

康軍節度使依前提舉佑神觀恩命不允詔

十一月三十日

周漢世祚久長葢得同姓藩維之助朕用時憲不專為
恩卿屬近行尊謹飭而信厚司留務于兩使逮今十年
載疇厥勞俾領名鎮擁旄授鉞克壯宗盟亟其欽承副
我親之之意所辭宜不允

賜新授中大夫叅知政事錢良臣辭免同提舉

勅令所恩命不允詔 十二月四日

夏有政典商制官刑周命六卿垂法象魏因時損益雖
或不同合於人情其揆一也卿博習今古有猷有為以
助萬機方資碩望參裁三尺更藉通儒往貳相臣講明
畫一俾予憲度不愧盛王茲惟汝詣毋咈朕命所辭宜
不允

賜右丞相趙雄辭免提舉編修玉牒提舉勅令
所恩命不允詔 十二月四日

堯親九族蓋重本支漢約三章務宗簡易成書未備後
世何觀屬命朝紳交修鉅典茲煩相綏併總宏綱卿識

際天淵學窮今古洪鈞獨運固已優為眾職咸釐特其
餘事矧從近比庸示至懷遜牘雖來渙恩難格所辭宜
不允

賜昭化軍承宣使錢愷辭免知閣事幹辦皇城
司恩命不允詔

君門九重尤嚴於上閣宮隅七雉實護於中宸肆擇舊
人兼釐要職卿明懿之季子仁皇之外孫家傳忠孝之
風世席高華之寵竭違班著久即燕間茲趣對於便朝
蓋深嘉於宿望榮頒疊組日侍垂旒尚欽眷獎之恩毋
守謙冲之節所辭宜不允

淳熙六年

賜降授中大夫新知泉州軍州事韓彥直辭免

敷文閣學士思命不允詔

正月七日

朕甚重爵賞不妄予人有能趨事赴功則無所吝故雖踈遠之士尺寸之勞未嘗遺也而况於侍從之臣卿夙蘊才猷所臨底績永嘉之政威信並行海道宿奸俘獲殆盡為守將者不當如是乎峻班西清蔽自朕志庶幾九牧咸勸有功成命已敷豈容遜避所辭宜不允

賜皇弟璩上表再辭免除少傅加食邑食實封

思命不允不得再有陳請

正月二十三日

朕上奉親懼以隆孝治下敦友睦以壯宗盟雖觀會之有常顧豆籩之無遠卿醇和毓性愿慤禔身祿富萬鍾靡期忤侈位高九棘彌戒驕矜當國家間暇之時享祠館燕安之樂稽其積閱寵以殊遷既招馭貴之公亦廣因心之愛廷揚惟允謙執謂何所辭宜不允不得再有陳請

賜朝議大夫試尚書吏部兼侍講兼同修國史

兼權吏部尚書程大昌乞在外宮觀差遣或

小即不允詔

二月三十日

卿強學力行遇事不苟躋登從列自結眷知天官劇繁

正倚銓綜遽求外補殊異所期朕方汲：人才惟恐用之弗盡既擢用矣輕聽其去可乎祇率厥常益擴素蘊所請宜不允

賜降除朝請大夫叅知政事錢良臣辭免纂修

日曆特轉行兩官依例加恩：命不允詔 三

月二十七日

朕聞漢興五世隆在建元外攘夷狄內修法度改正朔易服色當是時乃有司馬遷斷自太初著為今上本紀豈非親見者其事詳傳聞者其辭略以時纂錄固太史氏之職歟朕祇承內禪歷年于此雖宵衣旰食發政施

仁不敢不勉顧閣休偉績未有以光汗青副墨之傳也今卿以輔弼真才筆削大手搃率諸彥奏成鉅篇翰墨策勳實為之冠進階二等仍衍戶封懋賞維公字今維信遜章來上非朕意為所辭宜不允

賜正議大夫右丞相趙雄辭免曾經預監修纂

隆興以後日曆奏成篇帙轉行一官依例加

恩：命不允詔 三月二十七日

昔房喬相唐太宗欲自觀史喬初不可已而為今上錄獻朕謂太宗欲觀固失矣喬不能守其^職亦豈為得哉今朕不然時政付之史筆故事也書成不自觀焉故事也

褒賞舊勞自丞相始亦故事也况卿早游東觀文規六
經嘗總宏綱勲在太史疊是二者而進一官賞非無功
得豈云幸方將消辰下制告于百辟以侈真儒之效丞
相安得而遜避哉所辭宜不允

賜大中大夫樞密使王淮辭免曾經預修纂隆
興以後日曆奏成篇帙特轉行一官依例加
恩：命不允詔 三月二十七日

後漢公卿有所撰述始集公府乃上蘭臺唐制專命大
臣纂錄時政季送史館蓋獻替之語非四近莫得而聞
傳信之辭非史官莫得而預事大體重實相關焉卿曷

以鄭公之學典領祕書比事屬辭齊驅班馬迨乎近歲
徧執事樞日紀見聞授之東觀今茲勒成大典固宜甄
錄舊勞已詔有司刻增秩之替益書社之數毋煩控免
稽我成命之行所辭宜不允

賜龍圖閣學士中大夫新除致仕林安宅辭免

除端明殿學士乞守舊職名致仕不允詔 三

月二十八日

朕於適臣恩意厚矣年至而告老則固留之留之不可
則優之所以隆體貌 風俗也卿精明敏達廉潔公
勤一去樞庭久更歲律雖登耄艾體力未衰納祿之言

數聞朕聽升華殿幄歸賁鄉閭祇服寵光毋煩謙避所
辭宜不允

賜朝議大夫新除權吏部尚書兼侍講兼同修
國史程大昌辭免國史日曆所經修不經進
特轉一官恩命不允詔 四月三日

朕出入起居惟恐不欽發號施令惟恐不減史氏所書
庶或無愧雖然此特兢之日行其道耳豈敢自以為多
若乃歲奉王卮以介親壽 之孝彌億萬年無有窮
己其於簡冊實有光焉茲朕所以因篇帙之成推賞而
致其善也書不云乎一人有慶兆民賴之况卿古學英

辭嘗與聞筆削之事進階示寵於理則宜又何遜焉所
辭宜不允

賜朝奉郎權尚書工部侍郎兼知臨安府吳淵
辭免除工部侍郎恩命不允詔 四月五日

六卿置貳班著甚崇再歲為真典常具在若乃才術素
高於當世政聲藹著於行都何待序遷當從明陟卿性
資開爽識慮精深比擢預于論思旋兼釐於浩穰茹甯
弗設吏自畏其公明枹鼓稀鳴民咸安其豈弟就陞惟
亞庸獎厥勤宜進服於恩章毋退循於冲節所辭宜不
允

賜龍圖閣學士中大夫林安宅再辭免除端明
殿學士恩命不允不得再有陳請詔 五月十

九日

引年納祿深嘉止足之高馭貴疏榮遐念樞機之舊既
兼隆於異眷宜申錫於徽章卿廉介有常疏通無滯雖
年齒之寢晚在體力以猶強懇辭真館之游聽遂安車
之適升華祕殿示寵故鄉其趣拜於恩綸毋教勤於遜
牘所辭宜不允不得再有陳請

賜正奉大夫右丞相趙雄辭免勅令所修進一
州一路酬賞格法了畢特轉一官依例加恩

恩命不允詔

七月十六日

八柄詔王宰司之職三章約法相國之功卿名世鉅儒
格天良弼比摠提於定令賴筆削以成書賞典具昭吏
姦咸革操以為驗稽以為決寧復竒它行此之信執此
之堅方資端亮推恩惟允避寵何謙所辭宜不允

賜中奉大夫叅知政事錢良臣辭免勅令所修
進一州一路酬賞格法了畢特轉一官依例
加恩：命不允詔 七月十六日

福威惟辟固出一時輕重眦功當存三尺卿奭邦哲輔
博古鴻儒比貳政機叅裁賞格制而用之謂之法既遂

宗成推而行之存乎通更資格守以應無窮之緒斯為可久之規遷秩則宜執謙毋過所辭宜不允

賜朝議大夫試兵部侍郎兼詳定一司勅令賜紫金魚袋劉孝躋辭免勅令所修進一州一路酬賞格法了畢特轉一官恩命不允詔

月二十日

郡國之吏賫伐自言於有司者衆矣可以與或抑之可以無與或得焉宜為成書以布大信卿博通今古明習憲度選繇侍從參預討論逮茲奏篇寵進華秩理無可避其敬承之所辭宜不允

賜龍圖閣直學士中大夫成都潼川府夔州利州路安撫制置使兼知成都府事胡元質乞除一在外宮觀差遣不允詔

七月二十四日

卿文能綏衆武可威敵頃被簡擢往臨坤維細大之務畢親兵民之政交舉朕所以釋然寬西顧之憂者資卿力也今上下相安邊鄙不聳正宜輕裘緩帶樂其成功奚為上書求代耶昔韋臯李德裕鎮蜀威有嘉績雖曰才智絕人亦惟朝廷久任之效尚勤宣布予不汝忘所請宜不允

賜中大夫參知政事錢良臣辭免叙復三官於

見今官上轉行恩命不允詔 九月二十四日

維我仁皇公於刑賞于時貳政曰度曰庠嘗削文階伸其効務隆體貌旋俾如初著之史編朕用時憲卿知周物表學探道原參豫政機夙夜匪懈比坐謬舉懇求自懲眷知日深固欲甄復矧遇恩需豈拘叙暮禡以終朝昔成卿志接於晝日今著朕心君臣之間恩義兩得祇服顯命毋煩遜章所辭宜不允

賜朝請即試右諫議大夫謝廓然辭免除刑部

尚書不允詔 九月二十六日

分職文昌夙高八座持平憲部專掌五刑匪躬哲艾之

資孰副選掄之意卿器閎學博識遠慮周負疏通應務之才持慷慨濟時之論揚歷具知於民隱簡求自結於即潛執法烏臺屢奮鷹鷂之擊通班騎省每嘉藥石之言欲增重於禁塗俾進聯於端右祇承定命毋事勞謙所辭宜不允

賜敷文閣學士太中大夫知泉州韓彥直乞特

除一在外宮觀差遣不允詔 九月二十九日

卿才猷敏政術精明獻納論思嘗率六官之屬中和宣布交騰兩郡之聲雖白雲之望良勤顧皂蓋之臨未久方懲教易姑復少安所請宜不允

賜特進觀文殿大學士判建康軍府事充江南
東路安撫使兼行宮留守陳俊卿再上表乞
致仕不允不得再有陳請詔 九月二十九日

鮮我方將詠於詩雅若不得謝著於禮經矧當未至之
年難狗必從之欲卿弼諧宿望屏翰重臣雍容天塹之
都坐嚴管籥浹洽靈河之潤遠及邦畿方共謹之是圖
在告歸而何遽精神尚壯盍思楚立老之成言用舍或
殊毋執歐陽脩之故事所辭宜不允不得再有陳請

賜少傅昭化軍節度使充醴泉觀使嗣王士輅
辭免除少師加食邑食實封不允詔 十月十
六日

朕念昔祖烈視今宗盟安懿曾孫王為最長五朝近屬
王乃獨存在眷禮以當殊豈他人之敢擬是以慈皇慶
壽躡升亞傅之班宗祀均釐特貳維師之秩茲為異數
安事常謙所辭宜不允

賜皇兄少保岳陽軍節度使充萬壽觀使永陽
郡王居廣辭免除少傅加食邑食實封不允

詔 十月十六日

於赫仁宗有加允弼王于列郡親則諸兄當肇講於宗
祈實參陪於酌獻尋加相綏用侈神釐昔常著於簡編
今適同於符契特升孤棘庸厚親賢何必抗章亟思承

命所辭宜不允

賜新授少師昭化軍節度使充醴泉觀使嗣濮

王士輅辭免令所司擇日備禮冊命宜允詔

十二月十一日

屬者祿將太室命王分獻於別廟均釐茅賞已陟亞
乃貢封章懇辭冊拜將何以稱吾優異之恩乎雖然年
高而禮彌恭爵隆而志愈下此謙文所以皆克其詔有
司如王之志載循冲守良切嘆嘉所請宜不允

賜新授少傅岳陽軍節度使充萬壽觀使永陽
郡王居廣辭免令所司擇日備禮冊命宜允

詔 十二月十一日

漢制大臣多延拜于廷晋氏以來亦間行此禮茲于敷
錫祭澤寵褒近親孤棘之班進居其次臨軒授冊於古
有稽載閱來章固辭盛典其從雅志以著夫謙德之美
為所請宜允

淳熙七年

賜武翼郎監潭州南嶽廟趙子棟辭免除宜州

觀察使安定郡王恩命不允詔 二月三十日

朕懷藝祖創業之功考熙寧襲封之制久虛厥次今得
其人卿率履有常宣勞惟舊既推屬籍之近復矜年齒

之尊峻陟廉車就開王社冀輒朝於魏闕庸增壯于宗盟避寵之言非予所望所辭宜不允

賜朝請即權尚書禮部侍郎兼侍講齊慶冑辭
免除禮部侍郎恩命不允詔 三月二十四日

舜雖以三載考績三考陟明然伯夷典禮后夔典樂實未嘗易所謂陟者但進其位序加其爵服而已卿以瓌姿偉望通才與學為朕簡擢累年于茲莅臺屬亞奉常佐宗伯凡郊廟之祭祀禮樂之情文或糾正其儀或討論其事俾予一代制作不愧于古時維汝嘉真拜貳卿庸宿其業服章著定寵渥俱隆師言允諧古誼亦協無煩

多避往即欽承所辭宜不允

玉堂類稿卷第九 終



